

NZAMBI KE SOBAKA DIBANZA YA YANDI?



. . . Nzambi. Beto bikana ya kutelama na bayintu ya beto ya kukulumusa, na mwa ntangu fioti.

Tata ya Mazulu, beto ke tonda Nge samu na konso kima ya lemvo yina Nge pesaka beto. Beto kele ya kulunga ve na—na mosi ya balusakumunu ya Nge. Yayi kele kieleka balusakumunu yina beto me lunga ve yina beto me kuzwa. Mpe beto ke sambila, Nzambi, ti Nge ke landila na kuvwanda na beto. Mu vwandaka tambula kuna mpe vwandaka kuwa mpeve yayi ya kitoko na lukutakanu, mu zaba ti ya me katuka na Nge. Na yawu mu ke sambila, Tata, ti Nge ke landila na kuzitisa lukutakanu na nkokila yayi, na Mvwandulu ya Nge, mpe belusa bambevo nionso mpe bantu ya mpasi. Pesa yawu. Bika yayi kuvwanda nkokila mosi ya nene yina beto ke zimbana ntama ve, samu na Mvwandulu ya Nge. Beto ke lomba yawu na Nkumbu ya Yesu. Amen.

² Mu ke zola kulomba pardo samu mu bumbaka beno ntangu ya yinda mazono na nkokila. Mu ke meka na kuvwanda na foti na nkokila yayi, mpe kaka samu ti beto sala nswalu mpe—mpe kusambila samu na bambevo. Kieleka mu kuwaka mbote na kutala lukutakanu ya mazono na nkokila. Ba monanaka ti bantu mingi belukaka. Mpe mu vwandaka na lusalusu mingi, bantu nionso vwandaka sambila, mpe kintwadi. Ya kele mutindu beto ke telemaka. Na yina, Mfumu sakumuna beno. Ntangu yayi, mu banza, mbasi na nkokila beto fwana vwanda. . . Mu banza ti ba zabisaka yawu yimeni. Ya kele kisika yankaka—yankaka. Mbote mingi.

³ Ntangu yayi beto baka Buku ya Nombres, kapu 22, na nswalu nionso, samu kaka na mwa dilongi ya fioti, samu na kulutisa mwa bansamunu, mpe na manima beto ke tula ntangu ya mingi na kati ya ndonga ya bisambu.

⁴ Billy tubaka ti yandi pesaka kinkuku ya nene ya bakalati, bankama zole to tatu ya yawu. Mpe ya ke baka kaka mwa ntangu fioti samu na kulutisa bawu na ndonga ya bisambu, na yina mu—mu ke tuba kaka mwa minuti fioti, na zulu ya baminuti makumi tatu ve, kana ya lendaka salama, mpe na manima kubanda ndonga ya bisambu, kusambila samu na bambevo. Na Deutéronome, na . . . Beno lemvokila munu.

⁵ Nombres, kapu 22 mpe nzila ya 31, mu zola kutanga yayi.

Mpe Mfumu zibulaka meso ya Balaam, mpe yandi monaka wanzio ya Mfumu me telama na kati ya nzila,

mpe mbele ya yandi ya kutelemisa na diboko ya yandi: mpe yandi kulumusaka yintu ya yandi, mpe yandi kubwaka na kizizi ya yandi.

⁶ Ntangu yayi yayi lendaka wakana mutindu mwa masonuku ya ngolo samu na ku—kupesa mvutu mpe samu na kuzwa lukutakanu ya beto ya kubeluka ya nzutu. Mpe mu ke meka na kuzwa ndonga ya bisambu kubanda ngunga ya yivwa, kana ya lendaka salama. Ntangu yayi mu zola baka dilongi yayi na nkokila yayi: *Nzambi Ke Sobaka Dibanza ya Yandi?*

⁷ Beno zaba, beto lenda soba mabanza ya beto, mpe samu ti beto—beto ke longuka fyoti mutindu yankaka, beto zaba ti beto vwandaka na foti.

⁸ Kasi mu ke kwikila ve ti Nzambi lenda soba mabanza ya Yandi. Samu ti, kana Yandi sala yawu, kuna kieleka Yandi zolaka vwanda ve ya seko, mpe Yandi zolaka baka lukanu ya kulutula mbote kana Yandi zolaka soba yawu. Na yawu Yandi. . . Lukwikilu yina mu ke na yawu na kati ya Yandi, ti—ti Yandi ke sobaka ve dibanza ya Yandi. Samu kana Nzambi me bakaka lukanu, Yandi fwana bikana na lukanu yina. Beno me mona? Mpe konso ntangu diambu yina ke salama, Yandi fwana sala mutindu mosi Yandi salaka na mbala ya ntete, to Yandi salaka yimbi na mbala ya ntete. Beno me mona? Na yina ya ke pesa beto kisika mosi kuna samu na kuzwa lukwikilu ya ba-bébé. Ntangu yayi beto lenda ve. . .

⁹ Yinga, lukwikilu kele ve kaka kima mosi na zulu ya dikasa, ti beno lenda pumbuka yawu *awa* mpe dyaka kisika yankaka. Ya kele kima yina fwana vwanda kieleka. Ya fwana vwanda ya kuvwandisa. Mpe, ntangu yayi, mu lenda tula ve lukwikilu ya munu na zulu ya mwa dibanza mosi. Ya fwana vwanda diambu yina ba me talisa na ntwala mu lenda vwanda na lukwikilu.

¹⁰ Kaka mutindu bakala ke na kusola kento, na kukwela. Na yina, yandi—yandi fwana vwanda na lukwikilu na kento yina yandi ke kwelana, to kieleka yandi ke na kukubamaka yandi mosi samu na dyambu mingi. Beno me mona? Na yawu yandi fwana, beno fwana vwanda na lukwikilu, mwa mambu ya ngolo, mwa lukwikilu samu na kuvwandisa yawu; na zulu ya ndinga ya yandi, na zulu ya yina muntu yankaka tubaka, to kima mosi. Yandi fwana vwanda na kima mosi samu na kutula kizizi ya yandi kuna na zulu, lukwikilu kuna na zulu.

¹¹ Na yawu mu ke kuwa yawu, kukutana na Nzambi, ya kele kaka na kima mosi yina mu lenda vwandisa lukwikilu ya munu na zulu mpe ya kele Ndinga ya Yandi.

¹² Samu, beto kele na mabanza ya luswaswanu, na kutala pene-pene ya beto nionso. Beto ke vwanda mpe beto ke kwenda kuzonzila kima mosi ya kudia, na yina, beto fwana vwanda ya kuswaswana na zulu ya kima ya kudia; mpe beto me salamaka ya kuswaswana, bansatu ya beto kele ya kuswaswana. Mpe na

yina ya ke salaka mabuundu ya beto, beto ke mona ti bawu kele ya kuswaswana na mabanza ya bawu na yina ya kele kieleka mpe yina kele luvunu. Yina ke pesa beto, mosi na mosi, bweso na kusala nsodolo.

¹³ Kasi, samu na munu, mu—mu ke kwikila ti Ndinga ya Nzambi kele kieleka. Mpe mu—mu ke kwikila ve ti ya kele lutendulu ya muntu mosi. Mu ke kwikila ti ya kele kaka yina Yawu ke tuba, ya kele Kieleka. Mpe ya kele mutindu mu ke bakaka yawu, kaka na zulu ya balufulu ya Yawu na kuvwandaka Ndinga ya Nzambi. Ntangu yayi, mu ke na lukwikilu mingi ve, mu banza, samu na kusala nionso ya yawu, kasi kieleka mu ke zola ve kutelama na mutindu ya muntu yina vwandaka na lukwikilu mingi samu na kusala Yawu kusala.

¹⁴ Mutindu, mumbandu, Enoch vwandaka na lukwikilu mingi yina yandi zolaka kufwa ve. Yandi bakaka kaka manima ya midi, mpe yandi lembaka awa na zulu ya ntoto mpe yandi kwendaka kaka na Zulu. Kieleka mu ke zola kuvwanda na lukwikilu mutindu yina. Kasi mu ke banza ti beto ke baka lukwikilu yina kilumbu mosi, mutindu beto ke kula na kati ya Yandi. Ntangu yayi ya beto . . .

¹⁵ Ya kele samu na yina mu soolaka kisika yayi, samu ti ya ke monana mutindu yina awa, samu na munu, ya kele mosi ya bisika na kati ya Biblia yina ke vwanda kisika ya masawula samu na dilongi na nkokila yayi, samu ti ya ke talana mutindu ti Nzambi sobaka dibanza ya Yandi, mpe tubaka na Balaam kima mosi ya kusala mpe na manima tubaka na yandi kima yankaka ya kusala. Na yawu mu banzaka, mu banza, kaka mwa ntangu fyoti, beto ke meka na kusungika kaka yayi fyoti, mpe kumona yina Yandi tubaka kieleka na yandi.

¹⁶ Na yawu ntangu yayi samu na kutelemina yayi. Beto zaba ti Balaam vwandaka profete. Mpe Balak vwandaka ntinu ya Moab, na ntangu yina. Mpe bawu vwandaka ve bantu ya kukwikama, kuna na Moab, bawu sadilaka Nzambi mosi yina Israel sadilaka. Samu ti, Moab, ba tungaka yinsi na mwana ya bakala ya Lot, na nzila ya mwana ya yandi ya kento, mpe na yawu bawu sadilaka Nzambi mosi. Kana beno tala, minkayulu ya bawu mpe nyonso vwandaka kaka kieleka mutindu mosi, bangombe ya babakala, mpe diaka bankombo ya babakala, ke na kuzonzila Nkwizulu ya zole. Mpe ntangu yayi kana misiku kele nyonso yina Nzambi ke lomba, na yina Moab vwandaka kaka mutindu muntu ya misiku na munkayulu ya yandi mutindu Israel vwandaka. Kasi beto ke mona bawu ntangu yayi, Israel kele na nzila ya kulanda Ndinga ya Nzambi, na yinsi yina ba silaka bawu. Mpe bawu kwisaka . . .

¹⁷ Awa ke vwanda kifwani ya kimuntu mpe ya kimpeve, ke na kukutana. Mpe ntangu kimuntu mpe kimpeve ke kutana, ya ke vwandaka ntangu nionso kunwana, samu ba ke nwanaka mosi na yankaka. Mpe Israël awa, zolaka, mu zola kutalisa yawu

mutindu Dibuundu ya kimpeve; mpe Moab mutindu dibuundu ya kimuntu, kaka dibuundu, yina beto ke bokilaka, dibuundu ya kimuntu.

¹⁸ Mpe beto nionso ke ndima ti ya kele na dibuundu, mpe ya kele na Kento ya makwela yina ke basika na dibuundu yina. Beto zaba yawu, ya kele kieleka.

¹⁹ Mpe bawu kututana awa. Mpe beto ke bakula ti ntangu bawu me kutana awa, yawu kumaka na yisi ya kima mosi yina mu ke zola kuzonzila na mwa ntangu fioti. Kaka na ntangu bawu vwandaka me kutana, mpe mosi monaka yina yankaka vwandaka sala, ya vwandaka na kumekula ya nene, mosi ya yankaka.

²⁰ Mpe ya kele kisika yina beto ke mona yawu bubu yayi, ti beto ke kuzwa bakumekula mingi. Mpe ntangu beno ke sala yawu, beno ke vwandaka ntangu nionso na mpasi. Beno lenda zinga ve luzingu ya muntu yankaka. Beto lenda mekula kima mosi ve. Beto fwana vwanda kaka yina beto kele. Beno fwana meka ata fioti ve, kana muntu *yayi* ke sala kima mosi, samu yandi ke sala yawu, beno ke banza ti beno fwana sala yawu, mpe. Beno ke sala yawu ve. Beno kele muntu mosi, samu na Nzambi. Mpe beto fwana meka ve na kumekula mosi na yankaka.

²¹ Mpe ntangu yayi, Israël, kaka na nzila ya kisalu, kulandila nzila ya bawu na lutumu, na nzila ya musiku ya Nzambi, na yinsi ya nsilulu, bawu kutanaka na Moab, nkonga yankaka ya bakwikidi.

²² Mpe mu banza ti yayi ke wakana yimbi mingi ve. Kasi mwa kifwanukusu mu zola kusala awa kele, Moab yina vwandaka ya kuvwandaka na yinsi, yandi vwandaka diaka mutindu diambu ya organisation. Yandi vwandaka na bantu ya yandi ya lukumu, mpe bantu ya yandi ya lukumu . . . ya kimfumu ya yandi.

²³ Kasi Israel vwandaka kaka muntu yina vwandaka yenga-yenga. Bawu vwandaka ve na kisika mosi bawu kwendaka. Bawu vwandaka yenga-yenga kaka mutindu Mfumu twadisaka bawu. Ntangu yayi, mu banza, mpe, Balaam, na manima na profesi ya yandi, tubaka, “Bantu ke vwanda ve na kati-kati ya bayinsi. Ya ke vwanda kaka ya kumwangana.” Mpe ya kele yina ya ke vwandaka ntangu nyonso. Mpe beto talaka, kututana kwizaka.

²⁴ Kaka mutindu Caïn mpe Abel, bawu kuvukanaka mpe na kututana. Mpe bawu na kuvwandaka bampangi, mpe bawu zole ya mama mosi, Eve. Mpe beto ke mona ti bawu bakulaka ti bawu vwandaka bantu yina ke kufwa, mpe ba basisaka bawu na Luzingu, na disamba ya Luzingu. Mpe bawu zole vwandaka meka na kuzwa nzila samu na kuvutuka kuna. Mpe kana beno tala, bana ya babakala zole vwandaka misambidi ya kieleka. Caïn vwandaka kaka musambidi mutindu Abel vwandaka. Mpe bawu zole tungaka ba-autel, na mutindu yankaka, dibuundu.

Bawu zole salaka munkayulu. Bawu zole sambilaka. Mpe bawu—bawu sadilaka Nzambi, bawu zole, kasi mosi ya bawu sadilaka Yandi yimbi.

²⁵ Ntangu yayi, beno me mona, beno lenda vwanda ya kusungama mingi mpe dyaka kuvwanda na foti. Beno lenda vwanda na foti. “Ya kele na mutindu yina ke monana mbote, kasi nsuka ya yawu kele banzila ya lufwa.”

²⁶ Ntangu yayi beto—beto ke mona ti yayi vwandaka kieleka mingi na Caïn mpe Abel. Mpe ntangu bawu monaka. . . Caïn kumonaka ti munkayulu ya Abel ba kuzwaka yawu. Mpe, mu lendaka telama awa samu na kutuba, samu na yinki Nzambi kuzwaka munkayulu ya yandi? Ya kele samu ti—ti yandi vwandaka. . . Na luzayikisu, yandi bakulaka ti ya vwandaka ve ba-pomme, to mu ke kwikila ntangu yayi bawu kele na yawu bitini-bitini to kima yina bawu kudyaka na nsaba ya Eden, yina salaka disumu. Mpe yandi monaka Adam. . . to, mu zola kutuba, Abel kwikilaka yawu (yandi) ya vwandaka menga. Na yina, ya vwandaka kieleka. Mpe Abel, na nzila ya luzayikisu, lukwikilu, pesaka na Nzambi munkayulu ya kulutula mbote na yina ya Caïn; yina Nzambi pesaka kimbangi na yawu, yandi vwandaka ya kusungama. Beno me mona? Mpe Dibuundu ya muvimba kele ya kutunga na zulu ya luzayikisu ya Kinzambi ya Ndinga ya Nzambi. Muvimba. . .

²⁷ Yesu tubaka mutindu yina. Kilumbu mosi, na kukulumukaka na mongo, Yandi tubaka na bilandi ya Yandi, “Nani beno ke tuba ti Munu kele Mwana ya muntu? To nani bantu ke tuba ti Mu kele?”

²⁸ “Mpe bayankaka ya bawu tubaka, mbote, Nge kele ‘Moïse,’ Nge kele ‘Élie,’ to ‘mosi ya baprofete.”

Yandi tubaka, “Kasi Nani beno ke tuba Mu kele?”

²⁹ Mpe Pierre salaka nsamunu yina ya nene, “Nge kele Klisto, Mwana ya Nzambi ya moyo!”

³⁰ Yandi tubaka, “Kyese na nge, Simon, mwana ya Jonas.” Mpe awa kele kuswana ya nene na kati ya bakwikidi.

³¹ Ntangu yayi dibuundu ya Katolika ke tuba yawu, “Kuna Yandi—Yandi tungaka Dibuundu ya Yandi na zulu ya Pierre, samu ti Yandi tubaka, ‘Nge kele Pierre,’ mwa ditadi, ‘na zulu ya ditadi yayi, mwa ditadi, Mu ke tunga Dibuundu ya Munu.”

³² Mbote, ntangu yayi, ba-Protestant ya kulutula mbote ke kwikilaka ti ya vwandaka na zulu ya Yandi mosi yina Yandi tungaka, na zulu ya Yandi, Ditadi ya nsongi. Kasi, beno me mona, Yandi vwandaka Ditadi ya nsongi na kivinga. Mu ke kwikila ti yina Yandi tungaka Dibuundu na zulu ya. . .

³³ Ve samu na kuvwanda ya kuswaswana, kasi, beno me mona, kyuvu vwandaka, “Nani muntu ke tuba ti mu kele?”

34 Mpe Pierre tubaka, “Nge kele Klisto, Mwana ya Nzambi ya moyo.”

35 Yandi tubaka, “Kyese na nge, Simon, mwana ya Jonas, nsuni mpe menga ve me monisa yayi na nge. Beno me longukaka yayi ve na kukwendaka na seminere. Beno me mona, ata mbala mosi ve ti beno me longokaka yayi na nzila ya dyambu yina yina me salama na muntu. Kasi Tata ya Munu, yina kele na Mazulu, me monisa yayi na nge. Beno me mona? Na zulu ya ditadi yayi mu ke tunga Dibuundu ya Munu, mpe mielo ya difelo lenda ve kununga Yawu,” luzayikisu ya kimpeve ya Yesu Klisto, Yina kele Ndinga. Na yina ya ke vwanda Kieleka ya kimpeve ya Ndinga, ya kele kieleka kisika Dibuundu ke pema.

36 Mu banza ti ya kele yina Abel kuzwaka na mbandukulu, luzayikisu ya kimpeve ti ya vwandaka ve mbuma ya bilanga to bisalu ya maboko ya beto, to nyonso yankaka yina. Ya vwandaka menga. Mpe yandi pesaka na Nzambi munkayulu ya kulutila mbote na—na yina Caïn salaka.

37 Beto ke mona na Abraham mpe Lot, kima mutindu mosi, na nsodolo, samu ti Lot kulumukaka, ntangu ntangu kumaka, ntangu dibuundu ya kimpeve mpe—mpe dibuundu ya kimuntu kotaka na kututana, samu na mivungi. Ba zolaka kabula mosi samu na yankaka. Mpe ntangu nyonso yina yayi ke sala, ya ke tula musoki.

38 Beto ke mona ti Abel, samu ti Nzambi yambaka yandi, mpe Yandi yambaka ve dikabu ya nene ya Caïn, yandi zolaka sala mpasi mingi, mpe vwandaka basambidi, mpe fukamaka mpe sambilaka, mpe nionso yina, salaka nionso yina Abel salaka, kaka yandi vwandaka ve na luzayikisu ya yina vwandaka kieleka. Na yawu beto talaka, ti ntangu Nzambi ndimaka luzayikisu ya Abel mpe dikabu ya yandi, ya salaka ti Caïn kukuma na musoki na Abel. Mpe kuna vwandaka kufwa muntu ya ntete.

39 Beto ke mona ti musoki me kuma kati-kati ya mivungi ya Abraham mpe Lot, mpe bawu zolaka kabwana.

Beto talaka ti Moïse mpe Koré vwandaka na kututana, mpe.

Yesu mpe Judas vwandaka na kututana.

40 Mpe mutindu ntangu nyonso, ya me vwanda kima mutindu mosi, mpe mutindu mosi ya kele bubu yayi, dibuundu ya kimuntu mpe dibuundu ya kimpeve kele na kututana ntangu bawu ke vukana. Ntangu yayi, muntu ya yinza ke meka na kufwanana na kimpeve, ntangu nyonso na kumekula ya nsuni. Kasi, mutindu ya vwandaka na Ésaü mpe Jacob, ya ke simba ve.

41 Nzambi me bokila Dibuundu ya Yandi, na nkumbu, ba me tula na lweka. Mpe na nsungi yina Yandi ke zinga kuna, Yandi ke monisa Yandi mosi na Yandi, konso ntangu, kaka mutindu Yandi

tubaka na Romains kapu 8, ti luzabu to nsodolo ya mantwala ya Nzambi lendaka telama kieleka. Caïn, to mu zola kutuba . . .

42 Ésaü mpe Jacob, ntete to mwana ya bakala kubutama, ntete bawu kuzwa siansi ya kusala nsodolo, Nzambi tubaka, “Mu me yina Ésaü mpe zola Jacob,” samu ti Yandi zabaka yina vwandaka na kati ya bawu, kubanda mbandukulu. Mpe beto zaba . . .

43 Beno bumba yawu na mabanza, Yandi zaba yina kele na kati ya ntima ya beno. Yandi zaba yina beno zola kutuba. Ata yina beto ke tuba, Yandi zaba yina beno zola kutuba.

44 Mpe ya ke nataka ntangu nionso mpasi. Mpe bawu, . . . ntangu nyonso, ya kimuntu ke mekaka ntangu nyonso, kubanda Caïn bebisaka Abel, yinza ke mekaka ntangu nyonso na kubebisa bisalu ya kimpeve. Beto ke mona yawu mutindu mosi bubu yayi, kima mutindu mosi bubu yayi. Ya ke lakisa ti ya me katuka na Satana, samu ti ya kele musoki mpe kumekula ya Kieleka.

45 Na yina, beto ke kwikila kieleka ti Nzambi ke sobaka ata fioti ve dibanza ya Yandi samu na yina Yandi tubaka. Yandi ke zitisaka ntangu nionso Yawu kele kieleka.

46 Kasi Yandi kele na muswa. Ntangu yayi, kuna, kisika mpasi ke vwandaka. Beto ke meka na kusala luzolo ya Nzambi, mpe Yandi ke pesa muswa na yawu. Kasi diaka kana beto baka muswa ya Yandi, ata ti ya kele mbote ve, Yandi ke sala luzolo ya Yandi ya muswa na kusala kuna, kintwadi, samu na kukembila luzolo ya Yandi ya kulunga.

47 Ya kele ve na kima ke tambula mbote ve, na Nzambi. Beto kele . . . Yandi zaba kaka kisika monte ke na kubaluka, na nkokila yayi. Ya kele ve na kima ke tambula mbote ve. Nionso ke na kubula kaka kieleka mutindu ya zolaka vwanda, nyonso. Beto banza ti ya kele luvunu, kasi Yandi zaba ti ya kele kieleka. Ya fwana vwanda mutindu yayi.

48 Mutindu na mbandukulu, Nzambi pesaka kaka muswa na disumu na kwiza, Yandi salaka yawu ve, yina vwandaka ve luzolo ya Yandi ya kulunga.

49 Kasi, beno me mona, Nzambi, Mpeve ya nene, Tata, na kati ya Yandi vwandaka binama, mpe bima yayi yina beno ke mona me talisama ntangu yayi kele kaka binama ya Yandi yina me talisama pwelele. Yandi zingaka yandi mosi, Yandi vwandaka mpe ve Nzambi; Nzambi vwandaka kima ya kusambila. Yandi vwandaka Muntu ya Nene ya Seko. Mpe na kati ya Yandi vwandaka binama, mutindu ya kuvwanda Tata, samu na kuvwanda Mvulusi, samu na kuvwanda Munganga. Mpe ntangu yayi, wapi mutindu Yandi zolaka ntete . . . Yandi zolaka vwanda Tata, samu ti ya ke siamisa ti Yandi vwandaka Tata, kasi Yandi ke zinga yandi mosi. Yandi mosi kele yina ke kufwaka ve. Mpe, ntangu yayi, kasi binama ya Yandi fwana talisama.

⁵⁰ Ntangu yayi, samu na kuvwanda Mvulusi, ya fwana vwanda na kima yina ke zimbana. Mpe Nzambi lenda zimbisa kima mosi ve mpe na manima kuvulusa yawu. Ya ke vwanda ve ya kulunga na busantu ya Yandi mpe lufundusu ya Yandi ya nene. Kasi Yandi tulaka muntu na kimpwanza ya kusoola, na kuzabaka ti muntu ke kubwa. Mpe na yina, kuna, Yandi kumaka muntu, Yandi mosi, samu na kuvulusa muntu yina kubwaka. Ya kele samu na yina ti Yesu vwandaka Emmanuel. Kana Nzambi fidisaka muntu yankaka na ngaanda ya Yandi mosi, na yina ya zolaka vwanda kaka ve. Nzambi zolaka kwiza Yandi mosi mpe kubaka kisika. Mpe Nzambi zolaka kwiza ve na Kimpeve mpe kubaka kisika, Yandi zolaka kuma nsuni, na nsuni ya Mwana ya Yandi Mosi ya kuvanga.

⁵¹ Mpe Yandi lakisaka awa, na mbandukulu, ti luzolo ya Yandi ya kulunga zolaka vwanda samu na kuvanga muntu na fundu-fundu ya ntoto. Kasi, beno me mona, Yandi pesaka muswa na sexe na kukota. Yandi ata mbala mosi ve banzaka ti bana ke butuka na nzila ya sexe, kasi ya vwandaka na muswa, yina ntama mingi ve ke zimbana.

⁵² Ntangu yayi beto ke mona ti Moab vwandaka mwana ya makangu, na—na kubanda, samu ti ya vwandaka mwana ya bakala ya Lot, na nzila ya mwana ya yandi mosi ya kento. Ntangu yayi beno tala, mutindu dibuundu ya kimuntu, Moab ke monikisa dibuundu ya kimuntu, Moab ke salaka, mpe Israël, dibuundu ya kimpeve. Ntangu yayi, Israël, kento ya makwela, vwandaka . . .vwandaka talisa lubokilu na kubasika.

⁵³ *Dibuundu Yawu* mosi, mpova dibuundu zola kutuba “yina ba me bokila na kubasika, kubasika,” bayina me basika. “Beno basika na yandi, bantu ya Munu! Beno kabwana, me tuba Mfumu, mpe Mu ke yamba beno na Munu mosi. Kusimba ve bima ya bawu ya mvindu.” Dibuundu ya Nzambi me bokilama na yinza, na muvusu ya yinza. Beno kele diaka ve ya yinza.

⁵⁴ Mutindu mu vwandaka meka na kutuba, nkokila yankaka yina, na beno, ya kele ntangu beno zaba ti beno kele na ndandu ya mpulusu ya beno—ya beno ya Seko kaka ntangu yayi na kati ya beno, na nzila ya mbotika ya Mpeve-Santu, yawu me kindisa beno yimeni. Beno me vumbuka na lufwa ntangu yayi na Yandi, mpe beto me vwanda kintwadi na bisika ya Mazulu, na kati ya Klisto Yesu. Beno me mona, beno kele dyaka ve ya yinza. Kana beno zola yinza, mpe luzolo ya beno kele dyaka na bima ya yinza, na yina zola ya Nzambi kele ve na kati ya beno. Beno me mona? Beto me katuka, na kimpwanza na yinza. Ya kele dyaka ve na nsatu.

⁵⁵ Na Hébreux, mu banza kapu ya 10, tubaka, “Ya vwandaka kaka na lubambuku ya disumu, konso mvula, nzutu yango ya bibulu pesamaka. Kasi na dyambu yayi, musambidi na mbala mosi na kukumaka ya kuvedila kele dyaka ve na konsiansi ya

disumu, ata nsatu dyaka ve ya kusumuka.” Nionso me kwenda ntama na beno, samu beno me kindisama na Luzingu ya malu-malu.

⁵⁶ Mpe na yina dibuundu ya kimuntu kele kaka nkonga ya bantu na ba-denomination, yina me vukana. Ya kele dyaka ve. . . Mu ke bokilaka dyaka yawu ve “dibuundu.” Mu ke zolaka ve kutubila yawu. Mu ke zolaka kutala na yawu mutindu “club,” club ya ba-Methodiste, club ya ba-Baptiste, club ya ba-Pentecotiste.

⁵⁷ Kasi Dibuundu kele yina me butuka mbala zole yina kele na kati ya Klisto Yesu, yina kele bivangu ya malu-malu. Mpe na yawu beto ke mona dyaka yawu, ti Nzambi ke zitisaka Ndinga ya Yandi.

⁵⁸ Ntangu yayi Moab monaka, Moab talaka na zulu ya bilanga mpe monaka Nzambi ke tambula na kati-kati ya bantu yayi yina vwandaka ve yinsi yina ba me bongisa. Bawu vwandaka dumuka bisika nionso, kisika na kisika. Kasi kima ya ngitukulu, ti, bawu kwizaka na zulu ya bayinsi yayi mpe bawu bakaka bawu. Nyonso vwandaka na nzila ya bawu, bawu bakaka bawu. Ntangu yayi, bawu talaka, Moab vwandaka tala na zulu ya yawu, Balak, yandi talaka na yinsi ya Israel, mpe yandi tubaka, “Bantu ke fika kizizi ya muvimba ya ntoto.” Yandi tubaka, “Mpe bawu ke lekita bayinsi, kaka mutindu ngombe ke kudiaka matiti.”

⁵⁹ Mpe ba monaka ti, mosi ya banoti ya nene vwandaka ti wapi mutindu bawu kuzwaka luzayikisu ya nene yayi, ya vwandaka na profete na kati-kati ya bawu. Bawu vwandaka na profete, ntangu yayi, muntu yina twadisaka bawu. Yawu vwandaka ve sisiteme yina me salama na muntu mutindu yandi vwandaka sadila yawu, bimonikisi ya yandi—ya yandi na yandi, mpe nionso yina, kasi ya vwanda- . . . mpe bantu ya yandi ya lukumu, kasi bawu vwandaka na ntwadisi, ntwadisi ya Kinzambi yina ba me bokila.

⁶⁰ Mpe, oh, wapi kilumbu ya mawa ya vwandaka, ntangu dibuundu ya yinza katukaka na lutwadusu ya Kinzambi ya Mpeve-Santu, mpe pesaka lukumu na évêque to kima yankaka samu na kubaka kisika ya Yawu. Ya vwandaka kilumbu ya mawa. Mpeve-Santu fwana vwanda ntwadisi ya dibuundu. Ba me fidisa yandi samu na kusiamisa Bandinga ya Yesu Klisto, samu na kusala dibuundu kuzinga mutindu ya vwandaka zinga na mbandukulu.

⁶¹ Ntama mingi ve, lukolo mosi ya kitoko awa na—na mbanza yayi, seminere. Mpe ba kele na mosi na Phoenix. Mpe mosi ya babakala yango, to zole ya balongoki, vwandaka, kwisaka na munu mpe tubaka, “Beto zola nge, Mpangi Branham. Beto kele dyaka na kima ve na nge, ata fyoti ve, kasi beto ke zola kaka kusungika nge.”

62 Mpe mu tubaka, “Mbote, kieleka mu zola kuvwanda ya kusungama.” Na yawu, mpe na yawu mu tubaka, “Kana mu kele na foti, kieleka mu zola ve kuvwanda na foti; mu ke zonzaka na bantu mingi.”

63 Mpe yandi tubaka, “Mbote, tala mpasi ya nge.” Yandi tubaka, “Beno ke meka na kutalisa, to samu na kuzinga dyaka, nsambulu ya bantumwa. Ntangu, nsambulu ya bantumwa sukaka na bantumwa.”

Mpe mu tubaka, “Yinga, tata.” Mu tubaka, “Mbote, ntangu yayi kana . . .”

Yandi tubaka, “Ntangu yayi, mu ke swana samu na yawu ve na nge.”

64 Mu tubaka, “Mu ke sala yawu ve. Beto ve. Beto fwana sala yawu ve. Beto kele bampangi.”

Mpe yandi tubaka, “Mbote,” yandi tubaka, “Mu ke zola kaka kusadisa nge.”

Mu tubaka, “Ya kieleka mu zola kuzwa lusalusu.”

Mpe yandi tubaka, “Ntangu yayi, beno me mona,” yandi tubaka, “ntangu yayi . . . ya kele kieleka.”

65 Mpe mu tubaka, “Ntangu yayi, na kuzonzaka, beto fwana sadila ve babuku.” Mu tubaka, “Mu ke sadila ve ya munu,” mpe mu vwandaka na mosi ve kasi *Yayi*. Kasi na yawu—na yawu mu tubaka, “Mu ke sadila ve buku, kaka Biblia. Mpe, beno, beto ke sadilaka kaka Biblia.”

Yandi tubaka, “Mbote mingi.”

66 Mu tubaka, “Ntangu yayi, beto ke kwikila ti dibuundu ya bantumwa bandaka na Kilumbu ya Pentecote. Beno ke wisana na yawu?”

Yandi tubaka, “Yinga, mu ke ndima yawu.”

67 Mu tubaka, “Ntangu yayi beto me bakula ti Nzambi pesaka ngolo ya dibuundu kuna, samu na mouvement yayi ya bantumwa.”

68 Yandi tubaka, “Yinga, yina vwandaka lufulu ya Dibuundu. Ntangu yayi Dibuundu kele yimeni ya kutula na ndonga, mpe beto kele na ba-pasteur ya beto nyonso, mpe ba-organisation ya beto ya nene mpe nyonso. Beto ke na nsatu ya bima yina diaka ve, samu na kubenda bantu.”

69 Mu tubaka, “Ntangu yayi wapi kisika Biblia ke tuba yawu?” Mu tubaka, “Nge tuba na munu kisika Biblia ke tuba yawu.” Beno me mona?

Mpe yandi tubaka, “Mbote, ya kieleka ya ke tuba yawu ve mutindu yina.”

70 Mu tubaka, “Mbote, na yina, mu lenda ndima yawu ve kana ya me tuba yawu kaka mutindu yina ve, beno me mona. Beno

me mona?” Mu tubaka, “Beto kele. . .” Mu tubaka, “Ya kele mutindu ya fwana vwanda.” Mu tubaka, “Nge ke kwikila ti Nzambi ke na kubokila dyaka bantu?”

Yandi tubaka, “Yinga, tata.”

⁷¹ Mu tubaka, “Ntangu yayi nge ke kwikila ti Biblia kele kieleka, konso mvutu?”

“Yinga.”

⁷² Mu tubaka, “Ntangu yayi, nzonzi na Kilumbu ya Pantekote, wandaka Pierre, yina wandaka na bafungula ya Kimfumu.”

“Ya kele kieleka.”

⁷³ Mpe mu tubaka, “Ntangu yayi, nionso yina lukanu ya yandi wandaka, Yesu tubaka, ‘Yina beno ke kanga na ntoto, Mu ke kanga na Mazulu; yina beno ke zibula na ntoto, Mu ke zibula na Mazulu.’”

Yandi tubaka, “Mu ke kwikila yawu.”

⁷⁴ Mu tubaka, “Ntangu yayi, na Actes kapu ya 2 mpe na nzila ya 38, Pierre tubaka na bantu yina wandaka ke yituka bantu yayi ke zonzaka na bandinga yina me zabana ve, mpe bawu yufulaka yandi yina bawu lendaka sala samu na kuzwa mpulusu, mpe yandi tubaka, ‘Beni balula ntima, mosi na mosi ya beno, mpe beno botama na Nkumbu ya Yesu Klisto samu na mulemvo ya disumu, beno ke kuzwa dikabu ya Mpeve-Santu; samu nsilulu kele samu na beno, mpe samu na bana ya beno, mpe samu na bayina kele ntama, mpe bayina nionso Mfumu Nzambi ya beto ke bokila.’ Ntangu yayi kana Nzambi ke na kubokila kaka, nsilulu yina mosi kele samu na bawu.”

⁷⁵ Mbote, yandi kwisaka awa mpe wandaka na mosi ya bimvuka ya Billy Graham awa yina wandaka sambila samu na lukutakanu. Mpe kimvuka ya bawu wandaka ya kuvwanda awa na Californie kisika mosi kuna, basabala fyoti me luta, na bisambu ya kieleka ya mudindu, ya kubyeka na Nzambi, kumanga madia, mpe Mpeve-Santu kubwaka na zulu ya nkonga ya muvimba mpe bandaka na kuzonza na bandinga yankaka. Mpe. . . Uh-huh.

⁷⁶ Ntangu yayi yandi kele mambele ya—ya dibuundu ya Nkundi, ba-Assemblée ya Nzambi na Tucson, na Arizona. Yandi tubaka, “Oh, Mpangi Branham, mu ke mata kuna mpe ke kuwa mbote mingi!” Yandi tubaka, “Beni telemisa kaka maboko ya munu, mpe,” yandi tubaka, “nkembo ya Nzambi! Mu ke yimbila kaka!” Mpe yandi tubaka, “Ata mbala mosi ve ti mu lendaka sala yawu na dibuundu ya Ngwisani ya Malu-malu ya ba-Baptiste.”

Mu tubaka, “Mu ke mona nge lenda ve. Ya kele samu na yina nge kele na ngaanda.” Yinga.

⁷⁷ Na yawu beno bawu yayi, beno me mona, Nzambi ke zitisaka Ndinga ya Yandi. Yina Yandi ke tuba, Yandi ke sala yawu. Nzambi fwana zitisa Ndinga ya Yandi.

⁷⁸ Ntangu yayi beto ke mona awa, ti, bilanda-landa ya nsuni yayi yina Moab kuzwaka. Yandi monaka profete yayi na kati ya Israel, yina vwandaka na kiyeka ya kusakumuna, kusinga, kutwadisa, mpe nionso yina, na yina yandi ke meka na kufwanikisa yawu, na nzila ya politiki.

⁷⁹ Ntangu yayi ya kele kaka yina salamaka na mabuundu bubu yayi. Ba mekaka na kuvukisa yawu na mutindu mosi ya sysiteme. Beno lenda sala yawu ve.

⁸⁰ Mpeve-Santu fwana vwanda ya moyo na kati ya Dibuundu, ntangu nyonso, na kutwadisaka Dibuundu samu na nsungi yina Yawu ke na kuzingila, samu na kusiamisa Ndinga yina ba silaka samu na nsungi yina. Nzambi zonzaka Ndinga, kubanda mbandukulu, mpe mingi samu na nsungi *yayi*, mpe mingi samu na nsungi *yina*, mpe mosi samu na nsungi *yina*. Ya ke salamaka ntangu nionso kaka mutindu yina. Mpe, beno me mona, mpe Mpeve-Santu fwana vwanda ya moyo na kati ya Dibuundu, samu na kusala Dibuundu yayi kuzinga kilumbu ya Yawu. Ya fwana vwanda awa bubu yayi, samu na kusiamisa ministere yayi ya kilumbu ya nsuka, bidimbu ya kilumbu ya nsuka, ya kilumbu ya nsuka ya kutiamuka ya Mpeve-Santu. Ya fwana vwanda kaka awa samu na kusala yawu, mpe beno lenda bakula yawu ve na nzila ya ba-systeme. Nzambi kele na sysiteme. Yandi kele Yandi Yina pesaka beto Mpeve-Santu.

⁸¹ Ntangu yayi, beto ke tala awa ti Moïse kuzwaka Ntinu, mpe ti Ntinu vwandaka Nzambi, yina pakulaka yandi. Mpe Balaam vwandaka mpe na yisi ya ntinu, Balak. Mpe ya vwandaka ya kulutula mutindu systeme ya politiki, beno me mona, Balak. Balaam, profete ya Nzambi, yandi kwendaka na Balak samu na kupesa yandi nsangu. Moïse kwendaka na Nzambi samu na kupesa nsangu. Yawu vwandaka luswaswanu.

⁸² Kasi, bawu zole vwandaka baprofete, samu ti bawu zole vwandaka ya kubokila na Nzambi; bawu zole kutanaka na Nzambi, bawu zole zonzaka na Nzambi, mpe bawu zole vwandaka ya kufuluka na Mpeve. Ntangu yayi mu ke vutuka na yinzo, beno me mona. Ntangu yayi, bawu zole vwandaka bantu ya kufuluka na Mpeve. Ntangu yayi, ya kele kieleka. Biblia ke tuba ti, “Nzambi kutanaka na Balaam mpe zonzaka na yandi.” Beno me mona?

⁸³ Na yawu beto ke tala, mosi na mosi ya baprofete yayi, bawu zole vwandaka baprofete, bantu ya Nzambi, bawu kumaka na ndonga ya bawu. Moïse tubaka na Nzambi. Mpe Balaam awa kwisaka tuba na Balak.

⁸⁴ Beno tala awa, na kubakaka kifwanukusu ya kimpeve mpe ya kimuntu, mutindu ya kulunga ya vwandaka. Moïse, yina Nzambi fidisaka, na nzila ya kisalu, kele ya kukutana mpe ke telemina na muntu yankaka ya Nzambi. Beno lenda banza mutindu yina?

85 Kasi beno tala wapi mutindu ya siansi bawu kuzwaka kuna. Ya vwandaka yinsi ya kubongisa.

86 Mpe Moise vwandaka twadisa bana ya Israel, kaka mutindu Nzambi lendaka tuba na bawu kisika ya kukwenda, ya kutwadisa na nzila ya Dikunzi ya Tiya, mpe Moyo ya kimpeve yina vwandaka twadisa nzila. Mpe Moise vwandaka kuzwa bansangu ya yandi na nzila ya Logos, ya kieleka, yina basikaka na Nzambi, Dikunzi ya Tiya yina; yina vwandaka Wanzio ya Ngwisani, yina vwandaka Klisto, Yina ba Pakulaka. Mpe yandi vwandaka lutisa nsangu ya yandi Kuna, mpe vwandaka pesa yawu na bana ya Israel, na nzila samu na kukwenda na yinsi ya nsilulu.

87 Kasi muntu yayi nionso sukaka, mpe yandi vwandaka na kimfumu ya yandi. Yandi vwandaka na mabuundu ya yandi. Yandi vwandaka na nyonso kaka kuna na ndonga. Na yina yandi ke fidisa samu na kuzwa muntu yayi, samu na kwiza mpe kusinga bantu yayi. Mpe beno tala, beno lenda banza, ti profete mosi, muntu mosi ya Nzambi na kumonaka bisalu ya Nzambi na muntu yankaka, mpe kumeka na—na kutula ntembe na bisalu yina ya Nzambi, ntangu yandi zabaka, zolaka zaba ya kulutila mbote. Ntangu yayi Balaam, ntete ntangu. . . Balak fidisaka na yandi mpe tubaka na yandi, “Kwiza mpe singa bantu yayi.” Ntangu yayi Balak salaka kima ya kieleka, to. . .

88 Balaam, mu zola tuba, salaka kima yina vwandaka mbote, yandi sosaka Nzambi. Yandi sosaka Nzambi, ntete. Ntangu yayi, yawu yina yandi zolaka sala.

89 Mpe na yina Nzambi pesaka yandi mvutu ya kulunga, ya kukondwa mvindu, “Kukwenda ve na yandi! Bika bawu swi. Nge singa bantu yina ve. Ba me sakumuna bawu.” Ntangu yayi, yina zolaka vwanda ya kulunga. Ntangu Nzambi tubaka kima mosi, Yandi lenda soba yawu ve. Beno tala, luzolo ya Yandi ya kulunga vwandaka, “Kukwenda ve! Kutelemina bantu yina ve. Bawu kele bantu ya Munu.” Yina vwandaka luzolo ya Yandi ya kulunga.

90 Kasi Balaam vwandaka ve mutindu bantu yango, na kubanda. Beno me mona, beno bawu yayi. Bantu yikwa ya Balaam ke salaka beto bubu yayi? Kima mutindu mosi, kima mutindu mosi! Bawu zaba mbote.

91 Ba vwandaka na yawu na bilumbu ya Mfumu ya beto Yesu. Nicodeme kwizaka mpe tubaka, “Rabbi, beto zaba ti Nge kele Muntu yina Nzambi fidisaka, to—to, Mulongisi yina Nzambi fidisaka. Muntu ve lenda sala bima yina Nge ke salaka kana ti Nzambi vwandaka na yandi ve.” Beno me mona, bawu zabaka yawu. Ya vwandaka dyaka na Balaam, beno me mona.

92 Ntangu yayi, Balaam vwandaka ve mutindu bantu. Beno tala quartier général ya yandi. Na manima ba fidisaka bantu mosi ya mbote kuna, samu na kutuba na yandi, “Ntangu yayi ya kele na bantu yankaka yina ke kwisa awa. Mpe mu me bakula ti nge kele

profete, nge kele muntu ya nene, na yina nge ke kwisa awa mpe nge ke singa bantu yayi.”

⁹³ Balaam tubaka, “Ntangu yayi, beno vingila fyoti, tii mu ke kota mpe ke sambila, mpe ke bikana mpimpa nyonso, mu banza ti Mfumu ke kutana na munu mpe Yandi ke tuba na munu.” Mbote mingi, na suka yina landaka, Mfumu kutanaka na yandi mpe tubaka, “Kukwenda ve! Kusinga bantu yina ve. Ba me sakumuna bawu.”

⁹⁴ Mbote mingi, Balaam kwendaka mpe tubaka, “Mbote, mu lenda kwenda ve, samu ti Mfumu tubaka na munu na kukwenda ve.”

⁹⁵ Ntangu yayi beno tala ntangu bawu vutukaka, mpe bakaka quartier général, samu na yandi na kukwenda kuna mpe kukanga lukutakanu yayi bawu kuzwaka, beno me mona, mbote, na yina, ba me bakula ti, quartier général fidisaka nkonga ya bantu ya nene ya lukumu, ya lendaka vwanda bishop, muntu yankaka, to ya lendaka vwanda nganga-nzambi ya yinsi, muntu mosi fidisaka kuna, “Tuba na yandi na kukulumuka mpe kusukisa yawu na mutindu nyonso!” Beno me mona?

⁹⁶ Beno tala, kubendama ya kimvuka ya yandi ya mbote mingi, makabu ya kulutila mbote, mbongo mingi, yandi tubaka, “Mu lenda zangula nge na kisika ya kulutila mbote. Mu lendaka sala beno, na kisika ya kuvwanda kaka muntu mutindu bantu nionso, mu lenda kumisa beno mwa zulu mingi ntangu yayi. Mu kele na muswa ya kusala yawu, samu ti mu kele ntinu awa na mouvement yayi ya nene. Mpe mu—mu lenda sala kima mosi ya kulutila mbote samu na nge, kana nge lenda sala yawu.”

⁹⁷ Beno tala, munkayulu ya malu-malu kufwaka yandi meso. Yandi zolaka zaba; yina Nzambi tubaka, Nzambi ke sala. Kasi ya kufwaka yandi meso. Mpe mutindu profete ya Nzambi, yandi zolaka vwanda ve ya kubendama na nzila ya kimvuka ya mutindu yina. Yandi zolaka basika na kimvuka yina, na kubanda.

⁹⁸ Mpe kana mu ke tuba na bantu yankaka ya Nzambi awa, ntangu ba ke meka na kutuba na beno na quartier général, ti, “Bilumbu ya bimangu me luta,” mpe yayi yina beto ke na kusalaka awa, mpe Mfumu Yesu me sakumuna beto, “mpe yina kele nkonga ya bufanatiki, ya kuyidika mpe emotion, ya kele ve na kima ya mutindu yina mutindu kubeluka ya Kinzambi,” basika na kimvuka yina, kaka kuna. [Mpangi Branham me fina misapi ya yandi—Mu.] Basika na yawu, samu ti Yawu kele Ndinga ya Nzambi yina me monisama. Bawu ke tuba, “Ya kele ve na kima mutindu bilumbu ya bantumwa. Ya kele ve na mbotika ya Mpeve-Santu. Yina ke zonga na bandinga, ya kele ve na kima na yawu kuna.”

⁹⁹ Oh, kasi, mpangi, beno kuwa yawu ve! Ya kele na mingi mosi mutindu Balaam, bubu yayi, yina kele ya kuvwanda na manima

na bilo ya bawu, kutanga Babuku yayi ya Biblia mpe zaba ti Yawu kele Kieleka. Kasi ntete kaka samu na kisika ya bawu, bawu ke baka ve ntelamanu ya bawu. Kaka kieleka. Beno tala, Nzambi . . . Yandi zabaka ti yandi zolaka vwanda ve na kimvuka yayi, to Balaam zolaka zaba yawu. Bawu, bawu ke basika na luzolo ya Nzambi. Bantu yina ke zonza beno mbala mosi na ngaanda ya luzolo ya Nzambi. Ntangu beno ke mona luzolo ya Nzambi, ti muntu ve kuzonza beno na yawu.

¹⁰⁰ Mu me zaba bantu ya mbote, me kwisaka na balukutakanu, me beluka, mpe ke vutuka. Mpe bawu ke tuba, “Oh, mbote, ya kele na kima ve na yawu. Beno kele kaka ya kusala. Ya kele ve na kima na yawu.” Mpe bantu ke kota na ntembe. Mu me monaka bantu kukwiza mpe kuyamba Klisto na kati ya ntima ya bawu, kuvutuka; mu banza kuzonza na bandinga, mpe kuvutuka. Mpe dibuundu ke tuba, “Kasi, beno kele—beno kele na nsoni na Buklisto,” mpe nyonso yina. Mpe, oh, la la, beno sala yawu ve—ve, beno me mona. Beno basika na kimvuka yina! Beno vwanda ntama na yawu.

¹⁰¹ Beno tala, Balaam sadilaka dilongi ya luvunu awa, samu na kusepelisa konsiansi ya yandi, beno me mona. Yandi tubaka, “Mu banza. Nge bikana dyaka mpimpa yankaka, mpe mu banza ti mu ke yufula Nzambi, nge me mona. Mbala yankaka Yandi sobaka mabanza ya Yandi.”

¹⁰² Kasi Nzambi ke sobaka ve dibanza ya Yandi. Ntangu Nzambi pesaka beto nsamunu ya mbotika ya Mpeve-Santu, na Kilumbu ya Pentecote, ya kele mutindu Yandi fwana bumba yawu. Yandi salaka nionso na nsungi ya Biblia, mpe Yandi ke sala ntangu yankaka yina muntu ke kwisa na zulu ya lufulu yina Yandi pesaka kuna. Kana beno kwisa, na kukwikilaka, na kubalulaka ntima, beno botama na Nkumbu ya Yesu Klisto samu na mulemvo ya masumu ya beno, mpe ke kwikila na Nzambi, Nzambi me tumama na ngolo na kulungisa mukanda yina, kieleka, samu ti Yandi kele dokotolo. Mpe Yandi ke lungisa yawu kana beno ke—kana beno ke tumama na yawu.

¹⁰³ Kasi beno lenda ve kupesa kimbangi ntangu yayi na kumeka na kuzwa mukanda yayi ya munganga, beno nata yawu na pharmacien mosi ya luvunu yina—yina lendaka tula kima yankaka na kati ya yawu. Ya lendaka kufwa mbevo. Ya kele samu na yina beto kele na bamambeke mingi ya dibuundu ya kufwa bubu yayi, ba ke na kumeka na kupesa mukanda ya yimbi. Nzambi kele na mukanda kaka awa na kati ya Biblia. Yandi kele mutindu mosi mazono, bubu yayi, mpe kukonda nsuka. Beno fwana baka nkisi mutindu Dokotolo tubaka na kupesa yawu.

¹⁰⁴ Biblia ke tuba, “Ya kele ve—ya kele ve na nkisi na Galaad; ya kele ve na munganga kuna?” Ya kieleka, ya kele. Yandi tubaka, “Na yina samu na yinki mwana ya kento ya bantu ya Munu kele na konditsyo ya yai?”

¹⁰⁵ Beno me mona, beto me kuzwa Biblia. Beto me kuzwa Munganga. Ya kele, kaka, pharmacien ke na kusalaka yimbi na mukanda ya Masonuku. Ya kele yina yawu kele. Beno ke meka na kutuba, “Bilumbu ya bimangu me luta. Ya kele ve na kima mutindu mbotika ya Mpeve-Santu mpe bima nyonso yayi. Ya kele buzoba.” Biblia kele kaka kieleka. Nzambi ke bakaka ve kima yina Yandi tubaka. Mpe bawu ke meka na kusadila kima ya luvunu, kima yankaka mutindu, “Mbote, beto ke kwikila *yawu*.” Mbote, ata yina beno ke kwikila!

¹⁰⁶ Ya kele yina Nzambi tubaka! Yandi tubaka, “Mu ke tsyamuna Mpeve ya Munu na zulu ya nsuni nyonso.” Yandi silaka yayi na bilumbu ya nsuka.

¹⁰⁷ Ba ke meka na kutuba balukutakanu, ti beno ke mona, ba ke bokila munu, “nganga-nkisi, nganga-nkisi ya kulengula, to—to Béelzébul, to mwa diabulu mosi.” Mbote, bawu fwana tuba yawu, samu ti bawu kele ya tata ya bawu. Ya kele yina yandi tubaka na yina me tala Yesu na mbandukulu. Mpe ya kele ve beto ke na kusalaka yayi, na mutindu nyonso, ya kele Yesu mosi, samu ti Yandi kele mutindu mosi mazono, bubu yayi, mpe kukonda nsuka. Ya kele Mpeve ya Yandi.

¹⁰⁸ Oh, kima mosi yina lendaka luta, kutina mpe kulu-... kutina lutumu ya Yandi. Bantu mingi ke mekaka na kutina yawu. “Oh, beno kwisa kota na dibuundu, mpe ya ke vwanda mbote mingi. Beto kele dibuundu ya ntama. Beto vwandaka awa bamvula mingi. Beto bandaka . . .” Yinga, ya kele kieleka. Kana ya kele mutindu yina, kuna dibuundu ya Katolika ya Rome me kuzwa yawu na zulu ya beno nyonso; ba kele ya ntete ya ba-organisation. Ba vwandaka ntete. Kasi, beno bambuka moyo, Dibundu ya ntete ve. Bawu vwandaka organisation ya ntete, mpe mama ya mosi na mosi ya bawu. Na yina, mosi na mosi ya bawu kele ya kuswaswana na Nzambi. Apocalypse 17 ke tuba kima mutindu mosi, beno me mona. Yinga, beto kele na bilumbu ya nsuka. Ntangu yayi, beno bambuka moyo, Nzambi ke bika beno, ata ti, beno me mona, ntangu yayi.

Mpe kuna Balaam, yandi banzaka, “Mbote?”

¹⁰⁹ Kuna Nzambi tubaka na yandi, “Kwenda na ntwala.” Samu na yinki? Nzambi zabaka yina vwandaka na kati ya ntima ya yandi. Nzambi zabaka ti ya vwandaka na kati ya ntima ya yandi na kubanda, na yina Yandi tubaka na yandi, “Kwenda na ntwala.” Yandi ke pesa muswa na yawu. Yandi ke pesa beno muswa ya kusala yawu. Yandi ke sakumuna beno, bambala mingi, na kusalaka yawu.

¹¹⁰ Yandi sakumunaka mpe Israël na manima bawu . . . Lemvo pesaka bawu yimeni profete, Dikunzi ya Tiya, luvukulu, bidimbu mpe mambu ya ngitukulu, basisaka bawu na Égypte, mpe nyonso, mpe dyaka bawu zolaka musiku. Nzambi bikaka bawu kuzwa yawu, kasi ya singaka bawu ntangu nyonso.

111 Yandi bikaka Balaam kulandila kaka mutindu yandi fwana vwanda, kasi yinki yandi salaka? Yandi kwendaka kuna mpe, na kisika ya kusinga bantu, yandi zolaka sakumuna bantu. Yandi lendaka singa ve yina Nzambi sakumunaka.

112 Mpe mu—mu tubaka na beno, mu zolaka sukisa na ngunga ya yivwa. Mpe mu talaka na zulu, mpe ya kele ntangu ntangu yayi, mpe mu kele na buku ya kufuluka na banoti awa.

113 Kasi mu zola kutuba yayi, samu na kumanisa, ti Nzambi sobaka ata fioti ve dibanza ya Yandi. Ntwadisi ya Yandi vwandaka samu na Balaam kukwenda ve. Mpe ntangu Nzambi ke sala nsamunu mosi, ya fwana vwanda kaka kieleka.

114 Ntangu yayi, Biblia ke tuba, “Yesu Klisto kele mutindu mosi mazono, bubu yayi, mpe kukonda nsuka.” Ntangu yayi, yina zola kutuba ve “na mutindu mosi.” Ya zola kutuba ti Yandi kele mutindu mosi mazono, bubu yayi, mpe kukonda nsuka! Yesu tubaka, na Santu Jean 14:12, “Yandi yina ke kwikila na Munu, yandi mpe ke sala bisalu yina Mu ke sala.” Ya kele kieleka? Yandi silaka, na Marc 16, “Bidimbu yayi ke landa bayina ke kwikila.”

Bawu ke tuba, “Mbote, yina vwandaka kaka samu na bantumwa.”

115 Yandi tubaka, “Beno kwenda na yinza ya muvimba mpe beno longa Nsangu ya mbote na bantu nionso. Bidimbu yayi ke landa bawu, na yinza ya muvimba, mpe na konso kivangu. Na Nkumbu ya Munu ba ke basisa bampeve ya yimbi. Ba ke tuba bandinga ya malu-malu. Kana bawu simba banioka, to kunwa manganga ya yimbi, ya ke sala bawu yimbi ve. Kana bawu tentika maboko ya bawu na zulu ya bambevo, bawu ke beluka.” Ntangu yayi, yina kele kikalulu ya Yandi.

116 Beno me mona, beto ke meka na kulungisa kima mosi. Beto ke na kumeka na kusala, kufwanikisa dibuundu na yina beto ke banza ti Ndinga ya Nzambi kele. Beto lenda ve kuvwanda ya kulunga na dibuundu. Beto fwana vwanda ya kulunga na ntwala ya Nzambi.

117 Mu ke tubaka ntangu nionso, ya kele ntangu mosi ya nene yina ba me vukisa. Beno ke pakula bimatini ya beno ya mbwaki, mpe beno ke tala mbote mfinangani ya beno ke pakula mbwaki mpe. Bayankaka na kati ya beno bakento ke lwata mutindu mosi ya yimpu, na dibuundu, mpe beno tala mbote bakento yankaka kuzwa yawu.

118 Mama Jacqueline Kennedy vwandaka na bansuki yayi awa ya kuzenga na yintu ya nene, mpe beno tala bakento nyonso. Yandi lwataka mwa ba-tablier yayi ya fioti, to bima ya mutindu yina, ya kele nsoni ya nene samu na kento na kuvwanda na bala-bala, na bielele yayi ya kukangama mutindu yayi. Beno tala bakento nyonso ke sala kima mutindu mosi. Ya kele kumekula, kasi ya kele na yinza. Dibundu me baka yawu, mpe ya kele nsoni ti bawu ke sala yawu. Ya kele yimbi samu na bawu na

kusala yawu, mpe ya kele nsoni. Mpe ntangu beto ke mona yawu kukota malembe-malembe na Pentecote, ya kele nsoni mingi. Ya kele kieleka. Kasi, beno me mona, dibuundu ke tulaka na yawu mpe ke bika yawu kukwenda.

¹¹⁹ Ntangu yayi, beto ke kipe ve. Mu ke kipe ve kana kazaka ya munu me fwanana na pantalon ya munu, to cravate ya munu me fwanana na kazaka ya munu. Mu zola nzingulu ya munu kufwanana na Biblia ya Nzambi mpe lutumu ya Yandi. Mpe ya kele yina beto mutindu bantu ya pantekote zolaka sala, ya kele na kimbangi ya beto kaka mutindu ya bawu vwandaka, samu ti Yandi kele Yesu mosi, Mpeve-Santu mosi, ngolo mosi. Yandi ke na kuzinga bubu yayi, mpe Yandi ke zinga na kati-kati ya beto.

¹²⁰ Ya ke bambuka munu moyo kilumbu mosi mama ya Yandi katukaka na Jérusalem, katukaka na kusambila, mpe tata ya Yandi ya lundi, Joseph. Mpe bawu salaka nzietolo ya bilumbu tatu, mpe na kubanzaka kaka ti Yandi vwandaka na bawu, mpe bawu monaka ti Yandi vwandaka kuna ve.

¹²¹ Mpe, beno zaba, mu zola fwanikisa yawu bubu yayi. Beno zaba, dibuundu me sala nzietolo tatu. Luther, Wesley, pentecote; nzyetolo tatu. Nzambi ke pesa bawu nsangu, kunungisama, Luther, yandi kangamaka na yawu; na manima kwizaka kusantisama na nzila ya Wesley; na yina mbotika ya Mpeve-Santu, na pentecote. Mpe mu ke kukiyufula munu mosi kana beto me kuzwa ve mpasi yayi nyonso ya nene kisika mosi kuna, samu na kutunga bima ya nene mpe kusala bima ya nene, mutindu Balaam vwandaka na dibanza ya yandi; ba-organisation ya nene, yina vwandaka luta mbangu na yankaka, mpe *yayi* diaka, na kupesaka mayaka ya wolo mpe bambwetete samu na lukolo ya Lumingu mpe yina lendaka kotisa bamambebe kulutula mingi, mpe kukotisa mwa kima mosi na kati ya dibuundu.

¹²² Mu ke tuba na beno, ya kele na Dibundu mosi ya kele ve na muntu ya luvunu, ya kele Dibundu ya Mfumu Yesu Klisto, yina me botama na nzila ya Mpeve-Santu. Beno kele ve ya kundimisa na kati Kuna. Beno kele ya kubutama na kati Kuna. Ba me fidisa beno Kuna na nzila ya Mpeve-Santu.

¹²³ Ba monaka ti, kibuti monaka ti Yandi vwandaka ve na kati ya bawu.

¹²⁴ Ntangu yayi na ngunga yayi, dyambu yayi ya nene ke na kulandana, ntangu beto zaba ti yinsi yayi ke na kuningana. Kaka yinsi ve, kasi yinza ke na kuningana. Ya me kuma na ntangu ya nsuka. Ya kele ve na kima yankaka yina mu zaba ke salama kasi Enlevement, Nkwizulu ya Mfumu Yesu Klisto. Nionso me kubama.

¹²⁵ Mpe beto ke mona kuvukana yayi. Oh, kuzwa konso ndandu, lukutakanu yayi ke na kwiza, kuzwa nyonso na yawu beno lenda kuzwa, ya kele ya Nzambi. Kana beno kele ve na Mpeve-Santu,

beno tula kaka yawu na kati ya mabanza ya beno beno ke kwenda ve awa tii kuna beno ke kuzwa Yawu. Ya kele mutindu ya kusala yawu. Beno vwanda kuna, samu ti beno. . . yayi kele, beno lendaka vwanda bweso ya beno ya nsuka. Ya lendaka vwanda ve na lukutakanu yankaka na Côte Ouest yayi. Ya lendaka vwanda na yisi ya mubu, na ntangu yina, na ntwala ya yankaka. Na yina beto zaba ve yina lendaka salama, na yina beto. . . Beto ke vingila balusambusu ya Nzambi kukwisa na zulu ya bayinsi.

¹²⁶ Ntangu yayi bika mu tuba yayi. Ba banzaka ti Yandi wandaka na nzila. Kasi bawu monaka ti, na mpasi ya lufwa, ti Yandi wandaka ve. Beno me mona, Yandi wandaka ve na bawu.

¹²⁷ Ntangu yayi beto ke mona, ti na ntangu yina ba me zangula kima ya nene yayi, mpe beto ke mona ti beto ke kondwa kima mosi na mabuundu ya beto, mpe yina kele ngolo ya Klisto.

¹²⁸ Ntangu yayi, beno tala, mu zola ve kusawula. Mu zola beno, mpe zola ya kieleka, ke sungikaka ntangu nionso. Ntangu yayi beto ke na kukondwaka Klisto na kati ya dibuundu ya beto. Beto ke na kukondwaka Klisto na kati-kati ya bantu ya beto ya Pantekote, mpangi ya beto ya bakala mpe bampangi ya bakento. Ya kele na kima ke tambula mbote ve. Balukutakanu ya bisambu ya mutindu ya ntama yina bawu wandaka na yawu, kilumbu ya muvimba mpe mpimpa, bawu kele dyaka na yawu ve. Bakento ya beto vwanda lwataka nsuki ya yinda; bawu ke salaka dyaka yawu ve. Ya ke vwanda nsoni samu na bakento na kupakula mpe kusadila mukubu, kuna na bilumbu ya ntete, mpe kusala mutindu bakento yayi ke sala. Kima mosi me tambula mbote ve. Kima mosi ve ke tambula mbote ve na Klisto, beno me mona, kasi kima mosi me tambula mbote ve. Kima mosi kele kisika mosi kuna. Chaire, wandaka, wandaka pesa muswa ve na kima ya mutindu yina, kasi ya ke sala ntangu yayi. Beno me mona, dyambu ya mpasi me landila, mpe beto ke na kukondwaka kima mosi.

¹²⁹ Beto kele ve na ngolo yina beto fwana kuzwa, kisika masini ya nene zolaka tambula, mpe bidimbu ya nene mpe mambu ya ngitukulu. Mbote, yinzo yayi zolaka vwanda ya kufuluka na ngolo ya Nzambi, ntangu yayi, tii nsumuki lendaka ve kuvwanda awa; Mpeve-Santu ke na kufundisa yawu, kaka na nswalu mutindu yina, mutindu Ananias mpe Saphira. Mpe beto ke na kukondwaka kima mosi.

¹³⁰ Ntangu yayi yinki salamaka? Bawu kwendaka sosa Yandi, na kati ya dikanda ya bawu, mpe bawu monaka Yandi ve na kati ya dikanda ya bawu. Na yawu wapi kisika bawu monaka Yandi? Kaka na manima kisika bawu bikaka Yandi.

¹³¹ Mpe mu banza, ntangu dibuundu ya beto kumaka na feti ya nene yayi ya nene ya organisation yina beto kuzwaka, mosi fwana kuluta yankaka, mpe fwana kuzwa mabuundu ya kulutila

nene, mpe kalasi ya bantu ya kulutila mbote, mpe bantu yina ke lwataka mbote mingi, mpe miyimbi ya kulutila mbote, mpe kutelama kuna mpe. . .

¹³² Mu ke zolaka bankunga ya mbote. Mu ke zolaka bankunga ya kieleka ya ntama ya pentecote. Kasi mu lenda ve kukanga ntima na kima yina, ya ke kwenda kaka ve na munu; beno simba mupepe ya beno tii beno ke kuma bleu na kizizi, kaka samu ba kuwa beno. Mu—mu ke kwikilaka na kuyimba na ntima ya beno, na Mpeve ya Nzambi, mutindu mu kuwaka awa ntama mingi ve. Beno me mona?

¹³³ Mu ke zolaka kuboka ya mutindu ya ntama, kasi mu banza ti kuboka lendaka landila kana miziki ke landila to ve. Mpeve ya Nzambi na zulu ya bantu, Yawu ke kulumusa balusakumunu mpe ngolo ya Nzambi. Mu ke kwikila ti muntu lenda pesa kimbangi, mpe kuyimba mpe kukumisa Nzambi, na kusalu ya bawu, kisika nyonso ba kele. Kieleka.

¹³⁴ Mpe ntangu yayi beto ke na kukondwaka kima mosi. Wapi kisika beto ke mona Yandi? Kaka kisika beto bikaka Yandi, na kati ya Ndinga.

Beto sambila.

¹³⁵ Tata ya Mazulu ya luzolo, mosi ya bampimpa yayi beto ke kanga Biblia yayi mbala ya nsuka, nkunga ya nsuka ke yimbama, dilongi ya nsuka ke longama, ba ke bokila ndonga ya bisambu ya nsuka, musumuki ya nsuka ke kota. Mpe na manima yinki? O Nzambi ya luzolo, beto zola ve luzolo ya Nge ya muswa, Tata. Beto tambula na luzolo ya Nge ya kulunga. Beto baka kaka—kaka ve Ndinga awa mpe kuna, mpe kusala Yawu na kulunga dogme to credo, to kima mosi. Beto baka Ndinga mutindu Yawu kele, na kukwikilaka Nsangu ya mbote ya mbote ya muvimba, nyonso yina Yesu longaka samu na beto na kusala. Beto ke kwikilaka ve ti bisalu ya bantumwa kele kaka lufulu. Beto ke kwikila ti Yawu kele Ndinga ya Nzambi, Yawu kele bisalu ya Mpeve-Santu ya Nge na kati ya bantumwa. Mpe beto ke kwikila ti Mpeve-Santu mosi, Mfumu, yina ke kwisa na zulu ya bawu, mpe mutindu bawu salaka, Ya ke sala kima mutindu mosi na kati ya beto, ntangu Yawu ke kwiza na zulu ya beto, kana ya kele Mpeve mosi.

¹³⁶ Na yawu mu ke sambila, Nzambi ya luzolo, ti lukutakanu yayi yina beto kele kaka na ntwala ya yawu, samu na kubanda mbasi na nkokila. Mu ke sambila, Tata ya Mazulu, ti ya ke vwanda lukutakanu ya kulutila nene yina mbanza yayi me kuzwaka ntete ve, samu na Mvwandulu ya Nge. Sakumuna konso muntu, O Nzambi, bika ti ya vwanda mbote mingi—na mutindu ya kuningana, bika ti nganzi ya Nzambi kubula na chaire. Bika ti bansumuki kuningana kuningana, kubula. Bika ti Mvwandulu ya Yesu Klisto kukwisa ya kieleka samu na bantu, ti bawu lenda kaka kukanga meso ya bawu mpe kumona Yandi kutambula na kati-kati ya bawu. Pesa yawu, Mfumu.

¹³⁷ Ntangu yayi, na nkokila yayi, kaka ntete yayi kusalama ti beto ke sambila . . . Nzambi ya luzolo, bayankaka ya bana ya Nge kele ya kubela. Ba me lwalaka, mpe—mpe ba me lwala. Mu me kwisa samu na kusambila samu na bawu. Nge ke zitisa yina mu me lomba Nge, na nkokila yayi, Mfumu, samu na kimbevo ya bawu? Mu ke tula kivuvu, na Nge, ya ke vwanda ve na muntu mosi ya kulemba na kati ya yinzo yayi ntangu balukutakanu ke manisa.

¹³⁸ Bisadi ya Nge nionso awa, yina me vwanda kuna, ke boka, ke telemisa na zulu ya maboko ya bawu, mpe awa na estrade, mpe tubaka “amen” na Ndinga. Tata, beto kele kimvuka mosi ya bantu. Beto me basika na yinza, na mitindu yango ya madidi ya ba-konditsyo na mutindu ya ngaanda, mpe beto me butuka na Mpeve. Beto kele ya moyo, na nkokila yayi. Mpe Nge tubaka, samu ti Nge ke zinga, beto vwandaka ya moyo mpe. Mpe beto ke tula kivuvu, Mfumu, mpe ke kwikila na ntima ya beto ya muvimba, landila Ndinga, ti beto me talisama na kati ya Nge.

¹³⁹ Ntangu yayi sala Bandinga ya Nge kieleka, na nkokila yayi, samu na kubelusa bambevo, mutindu mu ke sambila samu na bawu, mpe bayankaka yayi ke sambila. Pesa, Mfumu, ya ke vwanda mutindu yina. Mpe beto ke kumisa Nge samu na yawu. Beto me lomba yawu na Nkumbu ya Yesu. Amen.

¹⁴⁰ Ntangu yayi . . . [Muntu mosi me banda na kuzonza na ndinga yankaka. Kisika ya mpamba na bande—Mu.] Matondo na Nge, Tata Nzambi.

¹⁴¹ Beto ke kuwa yawu, kaka mutindu kilumbu mosi na kati ya Biblia, ba vwandaka na dyambu ya mpasi, mpe Mpeve ya Mfumu kubwaka na zulu ya muntu mosi mpe Yandi tubaka na yandi kisika ya kununga mbeni, kisika ya kukwenda. Beno kuwa Yawu. Beno vwanda kaka ya kusungama. Beno me mona, Mpeve ya Luzingu na kati ya beno, ke sungika beno na Ndinga. Beno me mona, kana Ndinga ke zinga na kati ya beno, Yawu ke zinga Yawu mosi kaka na nzila ya Ndinga.

¹⁴² Ntangu yayi, mazono na nkokila mu lutaka. Ntangu yayi, beno kele bantu ya mbote, mu kaka . . . Ya ke talana mutindu, mpe na yina mu ke banda na kukuma kiboba, mu—mu—mu zola kaka ti mu lendaka . . . Mu ke vwanda na beno ntangu nyonso, na Yinsi yankaka.

¹⁴³ Na yawu ntangu yayi beto ke sambila samu na bambevo, mpe ntangu yayi mu ke meka ve na kulonga mingi na ntangu mosi, mutindu mu salaka mazono na nkokila. Mpe ntangu yayi, Billy Paul kabulaka nkonga ya bakalati ya bisambu, mu banza nkama mosi ya bawu. Nge pesaka nkama, to zole? Bankama zole. Yinki bawu vwandaka? C.

¹⁴⁴ Nani kele na C, numelo ya ntete? Beno telemisa diboko ya beno, beto tala kana ya kele kieleka, ntangu yayi. Kalati ya bisambu, beno tala kalati ya beno ya bisambu, ya kele na

numelo mpe—mpe mukanda na zulu ya yawu. C, numelo ya ntete, telemisa diboko ya nge. Kuna na zulu. Mbote mingi, kulumuka awa. Numelo ya zole, tatu, yiya, tanu. Ntangu yayi, mpe, beno, muntu mosi ke kwisa awa mpe ke kanga bawu. Ntangu yayi beto zola ti mosi na mosi ya bakalati ya bisambu, kasi beto zola ti bawu kuvwanda na lweka *yayi*. Mosi, zole, tatu, yiya, tanu. Mu ke mona tatu ya bawu. Mpe kalati ya nge ya bisambu, tata? Yiya. Ntangu yayi ya kele na mosi yankaka? Tanu, ya kele muntu yina ke na kwiza kuna? Mosi, zole, tatu, yiya, tanu. C, numelo ya ntete, zole, tatu, yiya, tanu. Mbote mingi, ntangu yayi beno kwiza kaka mutindu ba ke bokilaka beno, numelo ya beno.

¹⁴⁵ Na yawu, mazono na nkokila, mu monaka bawu kuna, bantu ke solula. Beto zola yawu ve. Yayi kele dibuundu, beno zaba, stade ve. Na yawu, beto—beto, beno fwana zitisa ndonga.

¹⁴⁶ Mosi, zole, tatu, yiya, tanu, sambanu, sambwadi, nana, yivwa, kumi. Ntangu yayi beno tula yawu kaka na ndonga. Ntangu yayi, kalati ya bisambu sambanu, sambwadi, nana, yivwa, kumi. Mpe muntu mosi ke telemisa diboko ya bawu ntangu bawu ke. . . ntangu bawu kele ya kusungama kuna. Mpe beto ke sambila samu na bawu.

¹⁴⁷ Bantu yikwa ke kwikila na munu ntangu yayi ti Mfumu Yesu ke sala kimalu ya nene? Mu ke sala nyonso yina mu lenda sala. Ntangu yayi sambanu, sambwadi; sambanu, sambwadi, nana, yivwa, kumi, kumi na mosi, kumi na zole, kumi na tatu, kumi na yiya, kumi na tanu.

¹⁴⁸ Ntangu yayi beno kwiza kaka, samu ti bawu nyonso kuvwanda ve ya kufulukana na bantu mbala mosi, beno zaba, mpe na ziunga ya yawu. Ya kele samu na yina ba pesaka beno lutangu, samu na kukeba beno na ndonga, beno zaba. Beno vwanda kaka mutindu yina ve. . . Na yina mutindu ba ke bokilaka numelo ya beno, mbote, beno kwisa kaka kuna. Mbote mingi, mpe ntangu yayi beto zola. . .

¹⁴⁹ Ntangu yayi mu zola nyonso, muntu nyonso, kuvwanda kieleka na buzitu ntangu yayi. Mpe beto ke sambila na zulu ya yawu na mwa ntangu fioti, tii beto lenda sambila samu na bantu yayi. Mpe beto zaba ve yina Mfumu lendaka sala. Beto zaba ve yina Yandi ke sala. Kasi beto ke vingila Yandi kusala bima ya nene.

¹⁵⁰ Ntangu yayi, mu banza, kumi na tanu, mu kele na bantu mingi kuna? Billy Paul, wapi kisika nge kele? Mbote mingi. Kumi na tanu, kumi na sambanu, kumi na sambwadi, kumi na nana, kumi na yivwa, makumi zole.

¹⁵¹ Ntangu yayi, beno me mona, bawu kele yimeni ya kukutika. Na yawu ntangu yayi mu ke kuzwa, mu banza, mu banza ti mpangi-bakala mosi, na yina ntangu bawu ke kuma na nsuka ya ndonga, ti yandi bokila lutangu yina ke landa, beno me mona, na yawu beto nyonso fwana kutelama ve, beno telama kuna

ntangu ya yinda ntangu beto ke sambila samu—samu na bantu ya kubela. Mbote mingi. Ntangu yayi beto ke—beto ke . . . Mu zola—zola beno ku . . .

¹⁵² Mu zola kuzonza na beno na yina bawu ke na kuzwa bantu yango samu ti bawu vwanda ve ya kukutika kintwadi.

¹⁵³ Ntangu yayi, muntu mosi ve ke kwisa tii kuna ba ke bokila numelo ya beno—ya beno. Beto bokilaka yawu tii na kumi na tanu, mu banza ti ya vwandaka, to makumi zole, kima mosi kuna, mu ke tuba tii na makumi zole, mpe na manima beto vingila. Mpe yina ke vwanda mingi kuna na ntangu yayi, nionso yina kele kuna.

¹⁵⁴ Mpe ntangu yayi bakalati yikwa kele kuna? Beno telemisa maboko ya beno. Mpe bantu yikwa kele na bakalati ve? Beno telemisa maboko ya beno.

¹⁵⁵ Ntangu yayi, beno bambuka moyo, beno ke na kalati ya bisambu ve. Beto me vwanda awa bampimpa zole, mpe konso nkokila Mpeve-Santu me basika na kati ya kivinga mpe me belusa bantu, kukondwa kutala lutangu ya bakalati ya bisambu. Ya kele kieleka? Kalati ya bisambu ke salaka kaka kima mosi na beno, kusadisa beno na kukota na ndonga. Ya kele kieleka. Kasi beno kele na lukwikilu, mpe beno tala mbote Mpeve-Santu kubika estrade, kaka awa, mpe ke kwenda kaka na kati-kati ya bantu yina kuna. Bantu yikwa zaba ti ya kele kieleka?

¹⁵⁶ Ntangu yayi, mu—mu ke kwikila, mu ke kwikila ya kieleka, kana ya vwandaka na dibuundu yankaka na ngaanda ya dibuundu ya Pentecote, ti mu ke—lendaka kwenda na yawu mpe kukwikila, mu ke vwanda na yawu, kana mu banzaka ti ya vwandaka na kima ya kulutila mbote. Mpe ntangu beno ke kuwa munu kutuba kima mosi samu na ba-organisation, mpe bima ya mutindu yina, Mu ke teleminaka bantu ve. Ya kele samu . . .

¹⁵⁷ yinki kana beno monaka bakala mosi yina beno ke zolaka, kuna na kati ya bwatu ke na kukulumuka kuna na ntwala ya bitembo, mpe beno zaba ti bwatu yina ke dindisa yandi, mpe beno ke tuba, “Mbote, mu zola yandi, kasi yandi—yandi kele na banzila ya yandi mosi”? Ve, mu lendaka yawu ve sala. Yina kele ve na kati ya munu. Mu ke boka, mu ke kwenda mbangu mpe mu ke simba yandi, mu ke ningisa yandi, mu ke benda yandi, to kima yankaka, samu na kubasisa yandi kuna, beno me mona.

¹⁵⁸ Mpe mu zaba ti ya ke luta ve ba-chute. Ya kele kieleka. Ya fwana vutuka na Klisto, mutindu kima mosi. Ya fwana vutuka na—na Nzambi. Ntangu yayi mu—mu . . .

¹⁵⁹ Bantu nionso awa me vwandaka na balukutakanu ya munu na ntwala, ya kieleka? Beno telemisa maboko ya beno kana beno vwandaka na balukutakanu. Mbote mingi. Ya kele ve na . . .

¹⁶⁰ Ya kele na bantu ya malu-malu yina me kwisaka ntete ve na mosi ya balukutakanu ya munu? Beno telemisa maboko ya beno.

Mbote, yinki beno . . . Mu ata mbala mosi ve . . . Yayi kele mbala ya ntete beno me vwandaka na mosi ya balukutakanu ya munu? Beno telemisa dyaka maboko ya beno. Mbote, mu—mu—mu ke tuba na beno, mu . . .

¹⁶¹ Mu banza ti mu ke sala mbote na kusoba kima yayi. [Mpangi-bakala mosi me tuba, “Tendula mwa fyoti na yina me tala ministele ya nge.”—Mu.] Mbote, mu—mu ke sala mbote.

¹⁶² Beno, samu na beno bantu yina ke kwisaka, mu—mu ke . . . Ya ke baka munu diaka mwa ntangu fioti, baminuti fioti diaka. Bika mu tendula yawu, samu beno ke kwenda na dibanza ya yimbi, beno me mona.

¹⁶³ Mu ke kwikilaka na bisalu nionso ya Nzambi. Kasi mu ke kwikila ti Biblia ke sila beto, na bilumbu ya nsuka, ti ya ke vwanda, ke kwisa diaka, Dibuundu fwana kota mutindu mosi ya vwandaka, ti Yesu bikaka yawu ntangu yawu kwendaka. Beno me mona, ya kele Kento ya makwela, ya fwana vutuka na kisika yina. Ntangu yayi, beto me mona bisalu ya nene ya Nzambi, na nzila ya kunungisama, kusantisama, mbotika ya Mpeve-Santu, kuvutula ya makabu. Kasi na kulandaka nzila ya Abraham . . .

¹⁶⁴ Ntangu yayi, mu me longukaka ve, mpe na yina mu fwana sadila kima mutindu Jean Mubotiki. Yandi vwandaka me longukaka ve, mpe. Yandi kwendaka na ntoto ya kuyuma, pene ya bamvula yivwa, mpe yandi longukaka ata fioti ve. Na yawu malongi ya yandi vwandaka ya kutula na zulu mutindu yinza, “O beno nsungi ya banyoka.” Beno me mona, ya kele kima ya kulutula yimbi yina yandi monaka, mpe mutindu ya yimbi, mpe yandi bokilaka banganga-Nzambi yango “banioka.” Yandi tubaka, “Beno nsungi ya banyoka, nani me longa beno na kukima nganzi ke kwiza? Beno banda ve na kutuba, ‘Beto kele na yayi, mpe beto kele ya yayi.’ Nzambi kele na kiyeka ya matadi yayi,” yawu yina yandi monaka na nzadi, “samu na kuvumbula bana na Abraham. Mpe, diaka, soka,” yawu yina yandi sadilaka na ntoto ya kuyuma, “ba me tula yandi na nsimbulu ya yinti. Mpe konso yinti yina ke butaka ve mbuma ya mbote, ba ke zenga yawu.” Ya kele mutindu yina yandi yokaka, mpe salaka tiya na bayinti, beno me mona. Kasi bayinti ya mbote . . . Yandi—yandi ke salaka kaka malongi ya yandi mutindu yina.

¹⁶⁵ Na yawu, na yayi, mu zola ku—kutuba yawu mutindu yayi. Beto me kuma na ntangu ya nsuka, ntangu ya kuyonzika.

¹⁶⁶ Ntangu yayi, na nzyetolo ya Abraham, yandi kutanaka na Nzambi nzila nyonso na mitindu yankaka, mpe nyonso yina, yina beto lenda baka yawu mpe kulakisa yawu. Kaka, beto kele Nkuna ya Abraham, kana beto kele na kati ya Klisto. Mpe Isaac vwandaka kieleka mwana ya yandi—ya yandi ya yisi; yandi vwandaka mwana ya yandi, ya kuvukana. Kasi, na kimpeve, Klisto vwandaka Nkuna ya Abraham, Nkuna ya yandi ya kimfumu, lukwikilu ya yandi.

167 Ntangu yayi beto ke mona ti Nkuna ya yandi ya kimfumu kele, ke sala nzietolo mutindu mosi, ya kele, Kento ya makwela ya Klisto ke salaka nzietolo mutindu mosi na yina Abraham salaka. Mpe kidimbu ya nsuka yina Abraham monaka, ntete mwana ya nsilulu kukwiza, vwandaka ntangu Nzambi talisamaka na kati ya nzutu ya muntu, mpe Bawanzio zole kulumukaka.

168 Yesu tubaka, na Santu Luc, kapu 17 mpe nzila ya 30, ti, “Mutindu ya vwandaka na bilumbu ya Noé.” Yandi tubaka na yina me tala ntangu ya Noé. Mpe yandi tubaka, “Mutindu ya vwandaka na bilumbu ya Sodome,” beno me mona, Nkwizulu ya Yandi, “mutindu mosi ya ke vwanda na bilumbu ntangu Mwana ya muntu ke monisama.” Ntangu yayi, ata mbala mosi ve ti Yandi tubaka “Mwana ya Nzambi” me monisama. “Mwana ya muntu!”

169 Ntangu yayi, Yesu kwizaka na bankumbu tatu. Mwana ya muntu, yina kele profete; Mwana ya Nzambi, yina lutaka na nsungi ya Dibuundu; na yina Mwana ya David. Kasi na kati-kati ya Mwana ya Nzambi mpe Mwana ya David, landila Ndinga ya Yandi Mosi, mpe landila Malachie 4 mpe Masonuku mingi, Yandi ke vutuka na kati ya Dibuundu ya Yandi, na mutindu ya nzutu, na kati ya bantu, na . . . na kati ya bantu, na mutindu ya kuvwanda profete. Beno me mona?

170 Mpe beno tala mbote yina Muntu yayi salaka ntangu Yandi kulumukaka samu na kumona Abraham. Kima ya ntete, Yandi tubaka na Abraham ti nkumbu ya yandi sobaka, samu Yandi bokilaka yandi ve Abram, Yandi bokilaka yandi Abraham. Mpe ntangu Yandi salaka yawu, beto me mona ti—ti Yandi tubaka, “Wapi kento ya nge, Sarah?” S-a-r-a-h; ve S-a-r-a.

171 “Kasi,” yandi tubaka, “yandi kele na kati ya tenta na manima ya Nge.”

172 Yandi tubaka ntangu yayi, yandi vwandaka na bamvula makumi yivwa mpe Abraham vwandaka na bamvula nkama mosi, mpe Yandi tubaka, “Ntangu yayi mu ke kwisa tala nge landila nsilulu, ntangu ya luzingu.”

173 Mpe Sarah na kati, kuwaka Yandi, na kuwaka na nzila ya kibaka ya tenta, mpe yandi sekaka yandi mosi. Mpe Wanzio, Muntu ya kuvwanda kuna, tubaka, swasikisaka mpeve ya yandi na manima, na manima ya Yandi, mpe tubaka, “Samu na yinki Sarah me seka, na kutubaka samu na bima yayi?”

174 Mbote, ba bokilaka Sarah, mpe yandi mangaka yawu. Yandi tubaka, “Kasi nge salaka yawu.” Yandi vwandaka na boma.

175 Ntangu yayi Yesu tubaka, kaka ntete Nkwizulu ya Mwana ya Nzambi, to Mwana ya . . . Nkwizulu ya zole, ti nsungi yayi yina beto ke na kuzinga . . .

176 Yandi kwizaka mutindu Mwana ya muntu, profete, samu ti yina ke lungisa Masonuku. Moise tubaka, “Mfumu Nzambi

ya nge ke basisila nge profete mutindu munu.” Beto nionso zaba ti ya vwandaka Yesu. Mutindu yina ve? Na yawu Yandi zolaka kwiza landila Masonuku, profete. Ata mbala mosi ve ti Yandi kukibokilaka Yandi mosi Mwana ya Nzambi; Yandi kukibokilaka Yandi mosi Mwana ya muntu.

¹⁷⁷ Kasi ntangu yayi Yandi kele, na nsungi ya Dibuundu ntangu yayi, Yandi vwandaka Mwana ya Nzambi. Na Millénium Yandi ke vwanda Mwana ya David, ya kuvwanda na kiti ya kimfumu ya David. Kasi na kati-kati ya ntangu yayi, beto ke mona ti na nzila ya Masonuku, Yandi ke kukitalisa Yandi mosi diaka mutindu Mwana ya muntu, profete.

¹⁷⁸ Samu ti, Ndinga ya Mfumu ke kwizaka kaka na baprofete, ata mbala mosi ve na ba-théologien. Ya kele samu na baprofete. Mpe Mfumu tubaka ti Yandi salaka kima mosi ve, na kati ya Ndinga ya Yandi yina ke sobaka beto kaka, tii ntete Yandi ke lakisa baprofete ya Yandi. Mpe ntangu ya nsuka, bidimbu sambwadi yayi yina Biblia yayi me kanga, mansweki sambwadi ya bima nionso ya Klisto, fwana monisama ntete, mpe ba lenda nata yawu kaka na profete. Beto vwandaka sosa yawu, bamvula mingi, mpe beto ke kwikila ti Mpeve ya Yandi kele na kati-kati ya beto ntangu yayi, na yina beto ke mona . . .

¹⁷⁹ Ntangu yayi beno tala mbote ntangu Yesu kwizaka, beno tala mbote yina Yandi salaka samu na kusiamisa Yandi mosi ti Mesiya yina, Muntu yina ya Kupakulama. Kilumbu mosi, na manima Yandi kuzwaka . . . Tata kulumukaka mpe zingaka na kati ya Yandi, na mutindu ya yembe kulumukaka na Zulu, na kutubaka, “Yayi kele Mwana ya Munu ya luzolo, na Yandi Mu me sepela na kuzinga.”

¹⁸⁰ Ya kele samu na yina Yandi tubaka, “Munu mpe Tata ya Munu kele Mosi. Tata ya Munu ke zingaka na kati ya Munu. Ya kele Munu ve yina ke salaka bisalu; ya kele Tata ya Munu yina ke zingaka na kati ya Munu.”

¹⁸¹ Jean pesaka kimbangi, na kumonaka Mpeve yango ya Nzambi, mutindu yembe, ke na kukulumuka. Ndinga basikaka na Yawu, na kutubaka, “Yayi kele Mwana ya Munu ya luzolo na kati ya Yandi Mu me sepela na kuzinga.” Beno me mona, mpe Yandi zingaka na kati ya Yandi.

¹⁸² Ntangu yayi beno tala mbote ntangu ministele ya Yandi bandaka, Yandi zolaka sala Mwana ya muntu ntangu yayi. Ntangu yayi beno tala mbote yina Yandi salaka. Kuna kwisaka bakala mosi na nkumbu ya Simon Pierre. Nkumbu ya yandi vwandaka Simon na ntangu yina, na manima ba bokilaka Pierre. André vwandaka na lukutakanu ya Jean; mpe kuna ntangu Yesu kwizaka, mpe Jean talisaka Yandi, yandi monaka Yandi. Mpe André yufulaka mpangi ya yandi ya bakala, Simon, na kukwiza na lukutakanu na yandi.

¹⁸³ Mpe ba tubaka na yandi na nzila ya tata ya bawu, mutindu ya tubaka ti, “Ya ke vwanda na ntangu mosi, ntete Mesiya ya kieleka kukwiza, ti ya ke vwanda na mesiya mingi ya luvunu yina ke telema.” Ya ke vwandaka ntangu nionso mutindu yina. Yandi tubaka, “Kasi, bana, beno bambuka moyo, Mesiya ya kieleka, beno ke zaba Yandi samu ti Yandi ke vwanda landila Masonuku. Yandi ke vwanda profete. Ntangu yayi, beto vwandaka ve na profete bankama na bankama mpe bankama ya bamvula, kubanda Malachie. Kasi ya ke vwanda na bantu mingi yina ke tubaka,” yina beto zaba ti ya vwandaka; ya vwandaka na Yesu yina telamaka mpe basisaka nkonga, mpe nyonso yina, “kasi Mesiya yayi ya kieleka ke vwanda profete.” Mpe ba-Hebreux nionso ba me longa bawu na kukwikila yina bapofete me tuba kele kieleka.

¹⁸⁴ [Kisika ya mpamba na bande—Mu.] Kaka na yina mulobimbi yina me longukaka ve, yina ba tubaka na beto me longukaka mingi ve samu na kusonika nkumbu ya yandi, Biblia ke tuba ti yandi vwandaka “muntu yina zabaka kima ve mpe yina longokaka ve,” yandi zabaka ti ya vwandaka Mwana ya Nzambi. Yandi zabaka ti ya vwandaka Mesiya, samu ti ya vwandaka profete. Ya vwandaka na Yandi Yina tubaka na yandi nani vwandaka nkumbu ya yandi, mpe tubaka na yandi yina vwandaka nkumbu ya tata ya yandi. Na yina yandi zabaka ti ya zolaka vwanda profete, samu ti Muntu zabaka yandi ve. Mpe ba pesaka yandi bafungula ya Kimfumu.

¹⁸⁵ Mpe beto ke mona ti ya vwandaka na bayankaka ya kutelama kuna yina vwandaka kuwa yawu, mpe mosi na nkumbu ya Philippe, yina kuzwaka . . . yina vwandaka longuka Biblia na nkundi mosi, na nkumbu ya Nathanaël, yina vwandaka vingila Mesiya. Na yina yandi ke tambula pene-pene ya mongo, pene ya nzyetolo ya kilumbu, mpe ke vutuka. Mpe yandi monaka Nathanael yayi kuna na yisi ya yinti ya fike, ke sambila. Mpe yandi tubaka, “Kwisa, tala Nani beto me mona, Yesu ya Nazareth mwana ya Joseph.” Na yawu Nathanael vwandaka . . . to Philippe to . . .

¹⁸⁶ Nathanael, mu zola tuba, yina vwandaka muntu ya mbote, yandi tubaka, “Ntangu yayi, kima ya mbote lendaka basika na Nazareth?”

Yandi tubaka, “Mbote,” yandi tubaka, “kwisa kaka mpe mona.”

¹⁸⁷ Ntangu yayi, ya kele malongi ya mbote. Beno kwiza, mona samu na beno mosi. Beno vwanda ve na yinzo mpe kutonga. Beno kwiza, tala. “Beno tala Masonuku, na kati ya yawu beno ke banza ti beno kele na Luzingu ya Kukonda nsuka.” Yesu tubaka, “Yawu kele Yawu yina ke pesa kimbangi ya Munu.”

¹⁸⁸ Na yina na nzila ya kuvutuka, na ntembe ve, bawu zwaka mwa disolo. Yandi tubaka na yandi, yandi tubaka, “Nge zaba

kiboba ya mulobi yina yina lendaka ve kusié samu na mbisi yina nge ke na yawu kilumbu yina? Yandi tubaka na yandi. Beno zaba ti tata ya yandi vwandaka kuna na dibuundu, nkumbu ya yandi vwandaka Jonas. Beno ke bambuka moyo? Na yawu, Yandi—Yandi—Yandi tubaka na yandi nani yandi vwandaka.”

“Oh, mu fwana mona yawu.”

¹⁸⁹ Na yawu ntangu yandi belamaka, mpe mu banza ti yandi vwandaka na ndonga ya bisambu, kisika Yesu vwandaka. Mu zaba ve. Yandi tambulaka na Mvwandulu ya Yesu. Yesu talaka yandi, mpe tubaka, “Beno tala Israélite, na kati ya yandi luvunu kele ve!”

¹⁹⁰ Ntangu yayi, kisika ya ntete, beno ke tuba, “Wapi mutindu Yandi zabaka ti yandi vwandaka Israélite? Mbote, samu yandi vwandaka ya kulwata?” Ve, ve.

¹⁹¹ Ba-Esete nionso ke lwataka ba-turche yina. Ba ke lwataka mutindu mosi. Mpe ba tubaka, “Israélite.”

¹⁹² Mpe Yandi tubaka, “Luvunu kele ve!” Yandi zolaka vwanda muyibi to kima mosi, na yina ba zolaka lakisa yandi. Yandi tubaka, “Na kati ya yandi luvunu kele ve!”

¹⁹³ Mpe na yawu mutindu yina ya kukatula mpasi ya Nathanael, na yina yandi tubaka, “Rabbi, wapi ntangu Nge me zaba munu? Samu na yinki, mu—mu—mu ke na yayi ve. Wapi ntangu Nge me zaba munu? Mu me kutanaka na Nge ata fioti ve. Ba nataka munu kaka awa na Philippe. Wapi ntangu Nge zabaka yawu?”

¹⁹⁴ Yandi tubaka, “Ntete nge vwanda na yisi ya yinti ya fike, na yina nge vwandaka kuna vwandaka sambila, mu monaka nge.” Yinga. Beno me mona?

¹⁹⁵ Yandi tubaka, “Rabbi, Nge kele Mwana ya Nzambi. Nge kele Ntinu ya Israel.”

¹⁹⁶ Yesu tubaka, “Samu ti mu me tuba na nge yayi, nge me kwikila? Na yina nge ke mona ya kulutula nene na yayi.”

¹⁹⁷ Ntangu yayi, ya vwandaka na bayina vwandaka ya kutelama kuna. Ntangu yayi bika mu pesa beno mwa malongi. Ya vwandaka na bayina vwandaka kuna, ba-rabbin mpe banganga-Nzambi, mpe bawu tubaka, “Muntu yayi ke salaka yayi na nzila ya Béelzébul.”

¹⁹⁸ Mpe Yesu balukaka mpe tubaka, “Mu ke lemvokila beno samu na yawu,” samu ti kukatula-masumu kusalamaka ntete ve, “kasi kilumbu mosi Mpeve-Santu ke kwisa mpe ke sala kima mutindu mosi,” Yandi tubaka, “mpe kutuba mpova mosi na kuteleminaka Yawu, ba ke lemvokila beno ata fioti ve na yinza yayi to na yinza ke kwisa.”

Na kento yina na dibulu ya masa, bantu ya Samarie.

¹⁹⁹ Ntangu yayi, ya vwandaka na makanda tatu ya bantu na zulu ya ntoto. Beto lendaka vwanda ndombe, brown, jaune, nionso

yina beto kele, kasi beto me katuka na menga mosi. Mpe ya kele na makanda tatu ya bantu, yina katukaka na Cham, Sem, mpe bantu ya Japhet; mpe ya kele Juif, Bantu ya makanda, mpe Samaritain, kati-kati ya ba-Juif mpe Bantu ya makanda.

²⁰⁰ Ntangu yayi, beto Bantu ya makanda, ba-Anglo-Saxon, beto vwandaka mimpani, na kusambilaka biteki. Beto vwandaka vingila ve Mesiya.

²⁰¹ Na yawu ntangu Yesu kukitalisaka Yandi mosi mutindu Mwana ya muntu. . . Ntangu yayi beno kuwa mbote, mpe mu ke sukisa. Ntangu Yesu kwizaka, Yandi vwandaka ya kukangama na kutalisa yina profete tubaka ti Yandi ke vwanda, na yawu kuna na ntwala ya Israël Yandi monikisaka Yandi mosi, na ntwala ya Pierre mpe Nathanael mpe bayankaka kuna, mutindu Mwana ya muntu.

²⁰² Ntangu yayi Yandi ke na nsatu ya kuluta na Samarie. Mpe Yandi kwendaka kuna na Samarie, mpe kuna Yandi monaka kento mosi ya kuvwanda na dibulu ya masa. Beto zaba disolo, mpe mutindu yandi, bawu vwandaka solula kintwadi. Yandi kwisaka samu na kubaka masa. Yandi tubaka, “Natila Munu masa ya kunwa.”

²⁰³ Mpe yandi tubaka, “Ntangu yayi, ya kele na nkabwani awa, beto lenda kuzwa yayi ve. Mpe mu kele kento ya Samarie, mpe Nge kele Juif. Beto kele ve. . .”

²⁰⁴ Yandi tubaka, “Kasi kana nge zabaka Nani nge vwandaka tuba, nge zolaka lomba Munu masa.”

²⁰⁵ Yandi tubaka, “Mbote, dibulu ya maza kele mudindu, yina Nge ke fikula?”

²⁰⁶ Mpe disolo landilaka tii Yandi solulaka na mpeve ya yandi. Mpe ntangu Yandi solulaka na mpeve ya yandi, Yandi monaka yina vwandaka mpasi ya yandi. Bantu yikwa zaba yawu? [Dibuundu me tuba, “Amen.”—Mu.] Ntangu yayi bantu yikwa ya beno ya malu-malu me kwisa zaba ti kieleka? [“Amen.”] Ya kele kieleka, ya vwandaka kieleka.

Mpe yinki Yandi tubaka? “Kwenda baka bakala ya nge mpe kwisa awa.”

Yandi tubaka, “Mu ke na bakala ve.”

²⁰⁷ Mpe Yandi tubaka, “Nge me tuba mbote. Samu ti beno vwandaka na babakala tanu, mpe yina beno ke na kuzinga ntangu yayi kele ve bakala ya beno.” Yandi balukaka.

²⁰⁸ Ntangu yayi, yandi vwandaka ve mutindu banganga-Nzambi yina, yandi tubaka, “Yandi kele na dyabulu. Yandi kele nganga-nkisi to kima mosi.”

²⁰⁹ Yandi balukaka, mpe yandi tubaka, “Tata, mu ke mona ti Nge kele profete. Ntangu yayi, beto vwandaka ve na mosi bamvula bankama yiya. Dibuundu vwandaka ve na mosi

mutindu yayi. Kasi beto ke mona, mu ke mona ti Nge kele profete. Ntangu yayi, mu zaba ti beto ke na kuingila Mesiya. Mpe ntangu Mesiya ke kwiza, ya kele kima yina Yandi ke sala.”

²¹⁰ Ntangu yayi Biblia ke tuba, “Yandi kele mutindu mosi mazono, bubu yayi, mpe kukonda nsuka.” Kana yina vwandaka kidimbu ya kupakulama ya Mesiya kuna, na Samarie mpe na ba-Juif. . . Ntangu yayi, ata mbala mosi ve ti ya salamaka na ntuala ya Bantu ya makanda. Kisika mosi ve na kati ya Biblia Yesu salaka yawu ntete Bantu ya makanda. Bawu vwandaka na bamvula mafunda yiya ya kuingila Mesiya; beto me kuzwa bamvula mafunda zole, na malongi ya bawu, mpe, samu na kuingila Mesiya.

²¹¹ Ntangu yayi, kana yina vwandaka kutalisama ya Yandi kaka na ntuala kilumbu ya bawu kumana, ya fwana vwanda kutalisama ya beto, samu Yandi silaka ti Mwana ya muntu ke monisama Yandi mosi diaka na kilumbu yina yinza ke kuma mutindu Sodome diaka. Mpe muntu nyonso zaba ti beto kele kuna. Beno me mona?

²¹² Ntangu yayi, mu ke kwikila ti Yesu Klisto ke zitisaka konso Ndinga. Masonuku nionso me twadisama na kimpeve. Mu ke kwikila ve ti beto kele na mosi ya mbote, mpe ba ke fundisa beto samu na yawu, kana beto bwela ndinga mosi na Yawu to kukatula Ndinga mosi na Yawu. Apocalypse 22 me tuba mutindu yini. Mu ke kwikila ti Yandi kele mutindu mosi mazono, bubu yayi, mpe kukonda nsuka.

²¹³ Kieleka mu ke zitisa ba-Luthérien samu na kutelama na kilumbu ya bawu, ba-Méthodiste samu na kusantisama na kilumbu ya bawu, mpe ba-Pentecotiste samu na kutelama na kilumbu ya bawu, kasi beto ke na kuzinga na kilumbu yankaka. Beto ke na kuzinga ntangu ya vwandaka na mwinga, felele, mpusu, pene mutindu Blé, kasi Blé kele na kati ya mpusu. Mpusu bumbaka kaka Blé, bumbaka mwini ya ngolo na kuyoka Yawu. Mpe ntangu yayi denomination ke na kukwendaka ntama na Yawu, samu ti Yawu vwanda na Ntwala ya Mwana, samu na kuyela. Na yawu beto kele—beto kele na kati. . . Ya ke vwanda dyaka ve na ba-organisation yina ke telama. Yayi kele nsuka ya yawu. Beto vwandaka, ntangu nyonso pene ya bamvula tatu, ntangu nsangu ke banda, bawu ke bongisa yawu.

²¹⁴ Yayi me salama pene ya bamvula makumi zole, mpe organisation ve. Ya lenda ve. Beto kele na ntangu ya Blé, na ntangu ya kuyonzika. Mu lenda kuwa makelele ya nene yina ke na kwiza. Beto ke kwenda na Yinzo kilumbu mosi. “Yandi kele mutindu mosi mazono, mpe kukonda nsuka.”

²¹⁵ Ntangu yayi, mu kele Yandi ve, kasi mu kele kisadi ya Yandi. Mu ke kwikila ve ti beno ke tentika maboko na zulu ya bantu mpe ke pesa bawu makabu. “Makabu mpe balubokilu ba ke sobaka yawu ve.” Ba zabaka bawu na ntuala, ya Nzambi, samu

na kukutana na nsungi mpe ntangu ya nsungi yina. Mulongoki nyonso ya Biblia zaba ti ya kele kieleka. Moise butukaka kaka na ntangu yina. Jérémie, na ntangu, bayankaka nionso. Jean-Baptiste, na kati ya ntangu yina. Yesu vwandaka na ntangu. Mpe beto kele na ntangu. Yayi kele yina zolaka salama.

²¹⁶ Ntangu yayi, mu ke tuba ti Yandi kele moyo bubu yayi, mpe Mpeve ya Yandi. Na manima ya bansungi ya dibuundu, beto kele na nsungi ya dibuundu ya Laodicée, mbokolo ya nsuka, mpe ya kulutula yimbi na bawu nionso, samu ba tulaka Yandi na ngaanda ya dibuundu. Beno bambuka moyo, Mwana ya muntu, mpe ba tulaka Yandi na ngaanda ya dibuundu; organisation ve na organisation, kasi Muntu na organisation. Beno me mona? Ata mosi ya bansungi yankaka ya dibuundu kuzwaka yawu, kaka Laodicée. Kana beno kele ya kimpeve, beno ke bakula.

²¹⁷ Tata ya beto ya Mazulu, ntangu yayi mu me pesa kimbangi ya kieleka ya Nge. Ntangu yayi kana yayi kele kieleka, yina mu zaba ti ya kele, Mfumu, mu ke kwikila yawu kieleka, Nge ke pesa kimbangi ti mu me tuba Kieleka. Na Nkumbu ya Yesu Klisto. Amen.

²¹⁸ Mu ke yufula kima mosi, na mwa ntangu fioti. Mu zolaka kuzwa ve kuswasikisa mabanza na nzila, samu ti mu banzaka ti beno nyonso vwandaka kaka na ministere ya munu. Kasi samu na bantu yayi kele awa, bika ti bayankaka na kati ya beno kuna kukwenda kusambila, mpe bika kaka muntu mosi na nzila, to kima mosi. Mpe ntangu yayi kana Yesu Klisto ke baka muntu yayi. Ya ke simba ve kukondwa beno. Beno kele yina ke salaka yawu.

²¹⁹ Ntangu yayi, beno kuwa, kento yina simbaka lele ya Yandi, kilumbu mosi, mpe Yandi balukaka, yandi tubaka, “Nani me simba Munu?”

²²⁰ Bawu nionso tubaka, “Kasi, Nge ke mona . . .” To, Pierre tubaka, “Kasi, nkonga ya muvimba ke na kusimba Nge.”

²²¹ Yandi tubaka, “Kasi mu ke mona ti mu me lembe, to ngolo me katukila Munu.” *Ngolo* kele “ngolo.” Mpe yandi tubaka, “Mu ke mona ti mu me—mu me lembe.”

²²² Mpe na yina Yandi talaka na nziunga, na zulu ya kento, tii kuna Yandi monaka yandi, mpe tubaka na yandi samu na kubasika ya menga ya yandi. Mpe ti yandi. . . Yandi tubaka, “Lukwikilu ya nge me vulusa nge.” Mbote mingi.

²²³ Ntangu yayi, Yandi kele mutindu mosi mazono, bubu yayi, mpe kukonda nsuka. Mpe Ngwisani ya Malu-malu, Buku ya ba-Hébreux, tubaka ti, “Kaka ntangu yayi Yandi kele Nganga-Nzambi ya Ntete yina ke na kusambilaka samu na beno, yina lenda simbama na bansatu ya bimbevo ya nge.”

Ntangu yayi, awa, yina—yina kele mosi ya bambevo awa? Kwisa.

224 Ntangu yayi, samu na bantu. Mu ke salaka yayi ve samu na kulakisa, bankundi. Ntangu yayi beno sukisa na kubanza yawu. Beno bambuka moyo, mu ke na mabanza ya beno. Bantu yikwa zaba ti ya kele kieleka, mpe ke mona yawu?

225 Awa kele kento yina mu—mu me monaka ntete ve. Mu zaba kima mosi ve samu na kento yayi. Beto me butukaka kaka bakilometele ntama mosi na yankaka, mpe bamvula ntama mosi na yankaka, mpe awa beto me telama awa na nkokila yayi. Beto kele banzenza mosi na yankaka. Mu zaba nge ve. Ntangu yayi, mu ke na dibanza ve. Awa—awa kele—awa kele Santu Jean 4 diaka, bakala mosi ke kutana na kento mosi. Ntangu yayi, mu kele ve Yesu mpe yandi kele ve kento yina. Kasi awa kele kaka mutindu mosi. Mpe Yandi tubaka, “Beni mpe ke sala bisalu yina Mu ke sala.” Ntangu yayi, mu zaba ve. Ya ke lomba lukwikilu ya kento yayi na kusala yawu. Mu zaba kima mosi ve samu na yandi. Kasi ntangu yayi kana mu me tuba yawu yina kele kieleka, na yina Nzambi me tumama na ngolo na kusala. . . kutuba ti yayi kele kieleka. Ntangu yayi, na kuzabaka beno ve, kana Nzambi ya Mazulu. . .

226 Mpe mu me tuba Kieleka. Beni ke kwikila ti yina mu me tuba kele Kieleka? Nge ke ndima yawu kuvwanda kieleka? [Mpangi-kento me tuba, “Mu ke kwikila yawu.”—Mu.] Nge ke kwikila yawu? Mu lendaka ve kutelama awa na ntwala ya Biblia yayi ya Santu mpe kumeka na kusala yimbi na muntu mosi, muntu ya nsungi ya munu, mpe zaba ti mu fwana kutana na Nzambi kuna na Kiti ya Lufundusu. Beto fwana telama kuna, kilumbu mosi. Beto zaba yawu.

227 Ntangu yayi kana Nzambi lenda monisa, na munu, kima mosi na luzingu ya nge, ti nge zaba ti mu zaba kima mosi ve, samu ti mu zaba nge ve. Kana kima mosi, ya fwana vwanda kima mosi na luzingu ya beno. Mu ke zaba kima mosi ve samu na yawu. Ya fwana katuka na Ngolo ya kulutula mazulu. Mpe na yina ya ke vwanda na zulu ya beno, yina beno banzaka ti Ngolo vwandaka.

228 Ntangu yayi samu na beno bantu ya malu-malu. Ntangu yayi mu me simba diboko ya munu. Ntangu yayi, lemvo ya beno ke tambula ve mbote ntangu yayi, samu ti, beno me mona, beno kele mosi na mosi ya mpeve. Ntangu mu ke baluka, beno ke kuwa kaka mutindu kubenda ya bisika nyonso. Beni me mona, beno kele—beno kele bantu mpe beno kele na bampeve. Mpe beno kele mpeve. Kana beno kele ve, beno kele ya kufwa. Na yawu beno zitisa kaka, kaka mwa ntangu fyoti.

229 Mpe beno bantu awa, beno sambila. Mu vwandaka vingila yayi ve, mu me kwisaka ata fioti ve samu na yayi na nkokila yayi, ata fioti ve. Mu me kwisa kaka samu na kusambila samu na bambevo. Kasi yina kele bantu ya malu-malu.

230 Ntangu yayi, beno ke kwikila yawu? Kana Mfumu lenda tuba na munu yina kele mpasi ya nge, to yina nge kele awa,

kima beno me sala to fwana sala, to—to kima yankaka, na yina beno ke kwikila? Mbote mingi, mu ke na kumeka na kukutana na mpeve ya beno, beno me mona. Yawu yina mu ke meka na kusala. Mutindu Yandi salaka na kento yina na dibulu ya masa, Yandi tubaka na yandi mwa ntangu fioti, beno me mona, Yandi vwandaka lomba masa. Mpe ya kele yina mu ke na kumeka na kusala, ya kele kuzwa dibanza ya beno, kutanga mabanza ya beno ve; kasi ke meka mutindu Yandi salaka, ke zaba mabanza ya beno.

²³¹ Nge kele awa samu na estomac. Nge ke na mpasi ya estomac. Ya kele kieleka. Beno telemisa diboko ya beno kana ya kele kieleka. Beno ke kwikila ntangu yayi? Yina kaka ve, kasi beno kele na nzala ya kima yankaka. Beno zola mbotika ya Mpeve-Santu. Beno ningisa diboko ya beno kana ya kele kieleka. Beno me mona? Mu monaka Nsemo yango kukulumuka na zulu ya yandi, mpe na manima kuvutuka, beno me mona. Kwenda mpe kuzwa Mpeve-Santu, na Nkumbu ya Yesu Klisto, kwenda na ntuala.

²³² Beno ke kwikila ntangu yayi, ya malu-malu? [Dibuundu me tuba, “Amen.”—Mu.] Ntangu yayi beno ke tuba . . .

²³³ Ntangu yayi awa, beno me mona, ntangu kupakulama yina ke banda mbala mosi, na manima awa Yawu ke kwenda. Beno me mona, kaka na ntangu kento vwandaka ya kutelama, yandi yayi, yandi kele kaka na ntangu yayi . . . Yandi zaba ti ya kele na Kima mosi pene-pene ya yandi.

²³⁴ Bantu yikwa me monaka foto ya Dikunzi ya Tiya yina, Nsemo yina kuna? Na Washington, DC. Beno me mona? Ntangu yayi mu zola . . . Ya kele na kitezo yankaka, mutindu. Mu ke na kutalaka kaka na Yawu. Kuna Yawu kele kaka awa pene-pene ya kento. Mu ke na kutalaka kaka na Yawu.

²³⁵ Ntangu yayi, mu kele nzenza ya muvimba samu na kento yayi. Mu zaba yandi ve. Mpe mu ke tula ntembe mingi ti yandi zaba munu, kaka na kuvwandaka na lukutakanu. Kaka yina. Kasi kana Nzambi lenda tuba na munu kima mosi samu na beno, to kima mutindu kaka ntama mingi ve, nge ke kwikila ti mu kele profete ya Yandi, kisadi ya Yandi? Nge ke kwikila yawu na ntima ya nge ya muvimba? Mbote, bika ti Yandi pesa yawu. Beno kele, beno ke kutana na lipaso, mpe lipaso kele pene ya diboko ya beno. Ya kele ve na bisika na zulu ya bawu, kasi ya kele mpasi na diboko ya beno. Yina salamaka na nzila ya kisumbula, mpe ba ke zola sala nge lipaso. Nge ke kwikila, mpe ba ke sala nge lipaso ve, kana nge ke kwikila kaka na ntima ya nge ya muvimba! Amen. Nge ke kwikila ti mu kele profete ya Yandi?

²³⁶ Beno vwanda kaka—kaka na lukwikilu. Beno tula kaka ntembe ve. Beno kwikila kaka. Ntangu yayi, awa, ti kento yayi dyaka, samu ti kento yayi kele na nkadulu ya yimbi. Beno me mona kivudi yina ya ndombe? Bantu yikwa me monaka foto me

baka kivudi ya ndombe ya lufwa? Ya kele ya kukangama na zulu ya kento malu-malu yayi. Kana Nzambi sadisa yandi ve, yandi lenda zinga ve. Yandi ke na tumeur. Mpe tumeur kele na yintu. Uh-huh. Uh-huh. Uh-huh.

²³⁷ Nzambi ya luzolo, kana Nge kele awa pene-pene mingi ntangu yayi, yina zaba bima nyonso yayi, Mu ke sambila, Nzambi ya Luzolo, ti Nge belusa mpangi ya beto ya kento. Bikwa yandi kuzinga, Tata, samu na nkembo ya Nge. Mu ke lomba na Nkumbu ya Yesu Klisto. Amen.

²³⁸ Wapi faso? Nge kele muntu ya mbote. Kana mama zingaka, yandi zolaka vwanda na bamvula ya nge, mu banza. Yandi kele na Nkembo, na nkokila yayi. Yandi ke sambila ntangu nyonso samu na munu ntangu mu ke kwenda na lukutakanu. Mu tubaka na Mfumu. . . [Mpangi-kento me tuba, “Mu kele na bamvula makumi nana na tanu.”—Mu.] Mama? [“Mu kele na bamvula makumi nana na tanu.”] Bamvula makumi nana na tanu. Ntima ya nge sakumuka, mpangi ya kento.

²³⁹ Ntangu yayi, mu kele nzenza ya muvimba samu na nge, mu banza. Beto kele na bamvula ya kuswaswana na nsungi ya beto. Mpe mu zaba nge ve. Mu me monaka nge ata fioti ve. Beto kele kaka bantu zole me kutana awa na zulu ya ntoto, kasi nge kele Muklisto. Beno kele mukwikidi. Samu ti, ya kele samu na yina mu zaba yawu, ya kele nsatu ya mpeve ya beno. Beno kele, beno me yamba munu mbote, beno me mona. Mpe mu ke kwikila ti ya kele Mpeve-Santu, samu ti ya ke pesaka bisalu mpe bisalu ya Mpeve-Santu. Beno me mona? Mpe mu zaba ti Yawu kele Yandi. Mu zaba kima yayi yina beto ke zonzila kele kieleka. Ntangu yayi, mu zaba ti ya kele kieleka.

²⁴⁰ Ntangu yayi, mu zaba ve yina ke vwanda luvunu. Kasi kana Mfumu Yesu ke monisa na munu yina ke vwanda mbote ve na nge, ke. . . beno ke zaba kana ya vwandaka kieleka to ve, to beno tuba na munu kima yina beno salaka, to yina zolaka sala ve. Beno ke kwikila ti ya vwandaka Mfumu Yesu mosi yina, Nzambi mosi yina lendaka tuba na Philippe kisika yandi vwandaka, tuba na Simon yina vwandaka nkumbu ya yandi? Beno ke kwikila ti Yandi kele Mosi?

²⁴¹ Mipasi ya nge kele mpasi ya misopo. [Mpangi-kento me tuba, “Kieleka.”—Mu.] Ya kele kieleka. Ya kele kieleka ve? [“Yinga, tata.”] Nge ke kwikila munu ntangu yayi ti mu kele profete ya Yandi? Nkumbu ya nge kele Mama Bayer, Mama Bayer, Bayer, mutindu aspirine Bayer. Ya kele kieleka. Nge me beluka. Kwenda na ntuala, Yesu Klisto belusa nge. Nzambi sakumuna nge.

²⁴² Beno ke kwikila na nionso. . . Ntangu yayi kana beno kele kaka na lukwikilu, beno tula ntembe ve!

²⁴³ Ntangu yayi, beno kele kieleka awa ve samu na beno mosi. Nge kele awa samu na muntu yankaka. Ya kele muntu, mpe yandi kele awa ve, mpangi-bakala. Mpangi-bakala yina kele na

lupitalu ya yintu. Baka muswale yina nge me simba na diboko ya nge, na ntangu Mpeve kele na zulu ya nge, fidisa yawu na yandi. Tula yawu na zulu ya yandi, kutula ntembe ve, yandi ke basika na yinzo ya bambevo mpe ke beluka. Nge ke kwikila yawu? Nzambi sakumuna nge.

²⁴⁴ Beno ke tuba yawu, “Beno ke tuba, ‘Wanzio yango, na kilumbu ya nsuka kuna, Yandi vwandaka na mukongo ya Yandi ya kubaluka,’ kisika beno ke tala.”

²⁴⁵ Mu ke tala ve kento yayi. Mu ke balula mukongo ya munu. Ntangu yayi, mama, yina kele mbevo, nge lenda kuwa munu, tuba “yinga.” [Mpangi-kento me tuba, “Yinga.”—Mu.] Kana Mfumu Yesu ke monisa na munu yina kele mpasi ya nge, ntangu mu ke tala mutindu yayi, beno ke zaba kana ya kele kieleka to ve. Ya kele kieleka? Beno ke kwikila na yina ya ke lungisa yina Yesu tubaka, “Ya ke salama na bilumbu ya nsuka, mutindu ya vwandaka na bilumbu ya Sodome”? Beno ke kwikila yawu? Nge ke na kimbevo ya bumama, kimbevo ya bakento. Kwikila na ntima ya nge ya muvimba ntangu yayi, yawu ke kwenda mpe nge lenda vutuka na yinzo mpe beluka. Nzambi sakumuna nge.

“Kana nge lenda kwikila!”

²⁴⁶ Nge ke kwikila ti Nzambi ke belusa mpasi ya ntima yina? Mbote, landila kaka na kutambula, na kutubaka, “Matondo na Nge, Mfumu!” Kwikila!

²⁴⁷ Nge ke telema na suka mosi, nge lendaka tambula na mpasi. Arthrite kele kima ya yimbi, kasi Yesu Klisto kele Munganga ya arthrite. Nge ke kwikila yawu? Nge me kulumuka na kimatinu mosi, na lweka, nge ke kulumuka. Mu ke mona nge ke kusala yawu. Beno ke sala yawu diaka ve, kana beno ke kwikila. Nge ke kwikila ti ba tindaka munu samu na lukanu yayi? [Mpangi-kento me tuba, “Mu ke kwikila yawu.”—Mu.] Na yina, na Nkumbu ya Yesu Klisto, bika yawu bika yandi. Amen.

²⁴⁸ Nge ke na mpasi na estomac. Nge ke kwikila ti Nzambi ke bika nge vutuka na yinzo, kudya madia ya nge ya nkokila, kuwa mbote samu na yawu? Kwenda na nzila ya nge, kudya madia ya nge ya nkokila, kwikila mpe nge ke kuwa mbote.

²⁴⁹ Beno kele na kulemba ke kwiza na zulu ya beno, ya kele kieleka, samu ti ntima ya beno kele yimbi. Ya kele kieleka. Beno kele dyaka ve na yawu ntangu yayi. Kwenda, kwikila yawu.

²⁵⁰ Yinki ke salama kana mu tuba mpova mosi ve na beno, mpe mu tentika kaka maboko na zulu ya beno, nge ke kwikila munu, mpe, ti nge ke beluka? Kwisa awa.

²⁵¹ Tata ya Mazulu ya luzolo, mu ke sambila ti Nge ke belusa kento yayi mpe ke kumisa yandi mbote, na Nkumbu ya Yesu Klisto. Amen.

²⁵² Bantu yikwa awa ke kwikila, bantu yikwa me kwisa ya malu-malu, beno nionso?

253 Beno banza kaka, mpe na mpasi mu lenda mona bantu kukwiza ntangu yayi. Beno bambuka kaka moyo, vision mosi salaka ti Mfumu Yesu kulemba. Bantu yikwa zaba yawu? Kento mosi simbaka Yandi. Daniel monaka vision mpe yandi vwandaka na mabanza ya yandi, yintu ya yandi, bilumbu mingi. Bantu yikwa zaba yawu? Beno me mona? Mbote mingi.

254 Ntangu yayi bantu yikwa ya beno ke kwikila yawu, ti yayi kele Mpeve-Santu? Beno ke kwikila yawu na nyonso ya beno. . . Munu ve, ntangu yayi. Mpeve-Santu! Ntangu yayi awa kele bantu ya kuvwanda awa yina ke kwikila yawu, mpe.

255 Ntangu yayi bayankaka, ntangu yayi mingi ya beno bantu yina kele na bakalati ya bisambu, Mu zola muntu nyonso yina ke vwanda na ndonga ya bisambu yayi, beno telama, kaka mwa ntangu fyoti.

256 Beno tala, mu zola kuyufula beno kyuvu ya nene. Beno me funguna masumu ya beno nyonso yina kele kuna? Beno ke kwikila? Nge me funguna, mpe nge—nge ke kwikila ti nge ke beluka? Nge me funguna masumu ya nge nyonso mpe me kumisa yimbi nyonso mbote? Beno telemisa maboko ya beno, kana beno kele na yawu, na ntwala ya Nzambi, beno ke kwikila yawu.

257 Mpe ntangu yayi na maboko ya beno na zulu, mpe, beno ke kwikila ti ya ke lomba Mpeve-Santu, mpe yayi kele Mpeve-Santu yina ke na kusiamisaka kaka Yandi mosi na kati ya beno? Beno ke kwikila yawu na ntima ya beno ya muvimba? [Dibuundu me tuba, “Amen.”—Mu.] Beno ke kwikila? Na yina beno nionso lenda beluka.

258 Ntangu yayi beno kele na lukwikilu mpe beno tula kivuvu na milongi yayi yina kele ya kuvwanda awa? Beno ke kwikila na bantu yayi, mpe? Wapi mutindu samu na beto sambila samu na beno, mosi na mosi, mpe na manima beno kwiza mpe beno tentika maboko na zulu ya beno.

259 Yayi ke sala munu ya kulemba mingi. Yina ke landila kaka mutindu yina, ya ke kaka—ya ke simba munu kaka.

260 Mpe mu—mu ke kwenda na Afrique du Sud na manima ya yayi. Samu, oh, la la, beno zaba mutindu ya kele kuna kisika beno lenda kwandi ve kuzonza na bantu. Mpe ya ke vwanda. . . Beto ke vingila kaka bankama tatu ya fundu, lukutakanu mosi na mosi.

261 Na yawu beno ke kwikila kaka! Beno kele awa na Amerika, beno me mona Yawu mpe na ngaanda.

262 Nzambi ya luzolo, bantu yayi kele na nsatu. Mpe mu zaba kima yankaka ve ti Nge lenda sala, Tata, samu na kusiamisa na bawu na nzila ya Ndinga ya Nge, ti Nge kele Nzambi yina ke sobaka ve. Mu ke kwikila ti beto me mona bima mingi ya nene, Mfumu, mpe kudiaka na mesa ya Nge, na Madia yayi ya Kukonda nsuka ya Luzingu, ya kulutila kitoko, tii beto kumaka. . . mpe

kumaka ya kufundisa mingi na Yawu. Ya—ya me kuma kima ya mutindu nyonso. Beto kele ve, beto ke belama na Yawu mbote ve, Mfumu, ntangu beto ke mona, mpe mu ke banza na munu mosi me telama awa, mu fwana fukama na mabolongo ya munu, na kuzabaka ti kaka awa Mpeve yina vumbulaka Yandi na lufwa kele ya kutelama kaka awa. Mpeve vwandaka na zulu ya Yandi ntangu Yandi vwandaka zinga awa na zulu ya ntoto, kele kaka awa ntangu yayi. Mpe beto, misumuki ya mawa ya kukondwa kulunga, na nzila ya lemvo mpe kyadi ya Yandi, Yandi sumbaka baluzingu ya beto. Mpe beto me kuma kisika yango, bubu yayi, ke tambula na kisalu ya Yandi, mutindu Yandi tubaka ti beto ke sala kisalu ya Yandi. “Bisalu yina Mu ke sala beno mpe ke sala yawu.” Mu silaka bima yayi mpe mu ke siamisa yawu, awa na yinza yayi! Mfumu, mu ke vutula matondo mingi na Nge, ti ba lendaka tanga munu kitini ya bantu ya Nge, na kilumbu yayi ya nsuka.

²⁶³ Nzambi ya luzolo, bantu yayi kele ya kutelama. Bawu kele ya kubela, Tata. Mu kele ve na mutindu ya kubelusa bawu. Mpe Nge ke sala yawu ve ntangu yayi, Nge me belusaka bawu yimeni. Nge lwalaka samu na masumu ya beto, na bamputa ya Nge beto me beluka. Na yawu, Tata, mu ke sambila ti mosi na mosi ya bawu kuluta awa, ntangu beto ke sambila samu na bawu, ti bawu ke kwiza mutindu bawu vwandaka ntangu yayi na kutambulaka na yisi ya kulunsi. Samu bawu zaba, kukondwa ntembe, Mpeve-Santu yina me siamisama kele awa na estrade. Klisto ya Nzambi kele kaka na kati ya lukutakanu. Lemvokila konso disumu. Katula kukondwa lukwikilu nionso. Mpe bika ti mosi na mosi ya bawu kubeluka mutindu bawu ke luta na ndonga yayi. Na Nkumbu ya Yesu Klisto, mu ke lomba yawu. Amen.

²⁶⁴ [Mpangi mosi ya bakala me tuba, “Mpangi Branham, kana beto lenda vwanda na muntu mosi, mpe kuzwa ndambu na ntangu mosi, mutindu yina kuna bawu ke nkonga ve.”—Mu.] Yinga. Mbote mingi.

²⁶⁵ Ntangu yayi mu zola kuyufula kima mosi. Beno zola, bampangi ya munu, beno telama awa na munu?

²⁶⁶ Beno me mona, awa kele na kima mosi samu na yawu. Ba-evangeliste mingi ke kwendaka na mbanza mosi, mpe bawu ke salaka bisambu nionso samu na bambevo, mpe nionso yankaka. Mpe ntangu dibuundu, ntangu ya me kwenda, bantu me tungama kaka pene-pene ya evangéliste, beno me mona. Ya kele mutindu yina ve, bantu. Bantu yayi, mu ke tula ntembe na muntu nyonso na nsungi yayi. . . Mu zaba yawu, ya kele na bakumekula mingi, kasi mu ke tuba ve yina mu zolaka sala. Kasi bantu yayi lendaka sala yawu ve, ya kele kieleka, mpe mu ke tula ntembe mingi na yawu.

²⁶⁷ Kasi bawu kele kaka ya kutumama na Nzambi, na kutentika

maboko na zulu ya bambevo, mutindu mu to muntu yankaka. Nzambi ke pesa mvutu na bisambu ya bawu, mutindu Yandi ke vwanda na kisambu mosi. Yesu tumaka, “Bidimbu yayi,” tubaka ve ke landa William Branham, Oral Roberts, mpe nionso yina, “ya ke landa bayina ke kwikila.” Mpe bantu yayi me fuluka na Mpeve ya Nzambi. Ba me botama bantu, na Mpeve-Santu mosi. Mpeve yina vwandaka awa ke sala kisalu yina na mwa ntangu fioti me luta, Yandi kele kaka awa. Yandi kele mosi na mosi ya bantu yayi, beno me mona, mpe bawu nyonso kele ya kufuluka na Yawu. Na yawu mu ke lomba bawu na kusala mulonga ya zole awa, na balweka ya ndonga yayi awa, kana bawu zola, samu ti bawu tentika maboko ya bawu na zulu ya bambevo, mpe, mutindu bawu ke luta.

²⁶⁸ Mpe bawu zola bayina kele na bakalati ya bisambu samu na kutelama, bakalati ya bisambu kaka, samu na kutelama na couloir. Mpe bayankaka ya beno ke sambila, kaka baminuti fyoti ntangu yayi. Beno telama, na konso kitini, beno telama kaka na lweka ya kikento ya kitini. Beno telama kuna, na kitini ya beno, mpe na manima ba ke bokila beno. Ntangu beno ke mona ndonga yayi awa nsuka, bika ndonga *yayi* kutambula na kati ya yawu. Ntangu ndonga *yayi* ke suka, bika ti *yayi* kukota na yawu.

²⁶⁹ Mpe ntangu beno ke kwisa ntangu yayi, beno bambuka moyo, beno ke tambula kaka kana beno ke kwikila. Bantu yikwa na kati ya beno zaba, beno ke kuwa kaka na kati ya ntima ya beno, ti beno me sambilaka samu na yayi, mpe nge ke beluka kaka na ntangu nge ke luta na ndonga yayi? Telemisa diboko ya nge, tuba, “Mu me ndima yawu, Klisto, kaka na ntangu yayi, kaka samu ti Nge tumaka bima yayi.”

²⁷⁰ Ntangu yayi mu ke sambila samu na mosi na mosi ya beno. Beto ke sambila. Mu ke lomba na Mpangi-kento Rose to muntu yina kele na orgue kuna, Mpangi-kento Rose, nge lenda bula, *Munganga Ya Nene Kele Awa*, samu na beto. Mpe bika ti bantu, bantu nionso yankaka, kuvwanda na bisambu. Mpe na yina bawu ke luta na ndonga yayi ya bisambu, mu ke kwikila ti mosi na mosi ke beluka. Nzambi sakumuna beno. Bayankaka ya beno ntangu yayi beno kulumusa yintu ya beno, mpe beno sambila samu na bantu yankaka.

²⁷¹ Beno vwanda kieleka ya kusungama. Beno me mona, ya kele mutindu mwa mulongi yango ya Baptiste kuzwaka Mpeve-Santu, nkokila yankaka yina. Yandi vwandaka banza na yawu, kaka ya kuvwanda kuna, kieleka ya kusungama, mpe Yawu kubwaka na zulu ya kimvuka ya muvimba ya bawu. Beno fwana vwanda ya kusungama na Nzambi.

²⁷² Ntangu yayi Yandi me siamisa ti Yandi kele awa na beno. Yandi kele awa. Ntangu yayi ntangu muntu mosi ke tuba na beno ti yayi kele kaka nkonga ya bantu yina ke zangula ntima, beno zaba mbote ntangu yayi, mutindu yina ve, beno bantu ya malu-

malu? Yandi siamisaka Yandi mosi, ya kele Yandi. Mpe muntu yankaka ve lendaka sala yawu. Yayi me salama ve kubanda bilumbu ya bantumwa. Ya kele kaka ntangu yayi kuvutuka na dibuundu, mutindu ba silaka yawu. Mfumu sakumuna beno ntangu yayi.

²⁷³ Ntangu yayi, beno bantu, na yina beno ke luta na ndonga yayi, beno kwisa, beno sambila. Muntu nionso ntangu yayi, “Munganga ya nene kele awa ntangu yayi, Yesu yina ke kabulaka mpasi.” Ntangu yayi ntangu beno ke kwisa, beno kwisa na bayintu ya beno na yisi, na luzitu. Kuluta. Bantu yayi ke tentika maboko na zulu ya beno, beno ke beluka. [Kisika ya mpamba na bande—Mu.]

. . . -noti ya lembami ya selafa . . .

. . . ? . . . Ya kele nyonso ya kulunga. Mbasi na nkokila . . . ? . . .

²⁷⁴ [Kisika ya mpamba na bande—Mu.] . . . ? . . . kima mosi. Kasi, kaka kima ya kukikulumusa ya kutumama na yina Nzambi tubaka na kusala. Mu me monaka yawu kusalama bambala mingi. Beno me mona, Masonuku tumaka beto ve na kusambila samu na bantu, Yawu tubaka kaka, “Tentika maboko na zulu ya bambevo, bawu ke beluka.”

²⁷⁵ Ntama mingi ve, oh, ya kele . . . Mu ke tubaka ntama mingi ve. Dyambu vwandaka na kati ya dibanza ya munu ntangu yayi. Ya vwandaka pene ya bamvula tatu to yiya me luta, to kulutila. Beto vwandaka kaka awa na Californie. Bakento zole kwisaka kuna, mosi ya bawu vwandaka na kuvimba na kizizi ya yandi, mpe yankaka yina vwandaka na mpasi na estomac. Mpe bawu kwikilaka yawu kaka. Mu tentikaka maboko na zulu ya bawu, mpe tubaka, “Ntangu yayi, mu ke sala yayi na Nkumbu ya Mfumu Yesu.”

²⁷⁶ Ya vwandaka pene-pene ya ngonda mosi na ntwala. Mama yina vwandaka meka na kudia, na mpasi ya estomac, yandi lendaka sala yawu ve. Na suka mosi, “nsatu mosi ya madidi mingi kwendaka kuna” yandi, yandi tubaka, mpe yandi kwendaka kudia. Mpe yandi kwendaka mbangu samu na kutuba na mfinangani ya yandi, mpe nkalani ya yandi vwandaka ningisa ba-filet, mutindu *yina*, na kumekaka na kuzwa kuvimba yina bikaka kizizi ya yandi na nkokila yina.

²⁷⁷ Beno me mona, beno kwikila kaka, bankundi. Kana Yandi sala yawu samu na mosi, Yandi ke sala yawu samu na nionso. Mpe ya kele kaka kima ya pete-pete na kutentika maboko. Mpe ya kele yina Yandi tubaka na kusala. Beto zaba ve mutindu ya ke salaka. Mu zaba ve mutindu ya ke salaka. Ya kele kaka nsilulu ya Yandi. Yandi tubaka ti ya ke sala yawu. Mpe mu me kuzwa makumi ya mafunda, na yinza ya muvimba, bawu me beluka kaka. Nzambi silaka na kusala yawu, mpe ya kele nsilulu ya Yandi. Beno me mona, beto ke kwikila kaka yawu.

²⁷⁸ Ntangu yayi, beto nyonso ke na kwiza awa. Mpe beno yina lendaka telama ve, beno kwisa pene-pene, mpe beto ke kwisa samu na kusambila samu na beno. Ntangu yayi mu zola ti mosi na mosi ya beno babakala kukwenda kaka awa, kutentika maboko ya beno na kati awa, kana beno zola, kaka kuna. Mpe mu zola kutelama awa mpe kusambila, mpe na manima kukwiza tentika maboko ya munu na zulu ya bawu, mpe. Mbote mingi, kota kaka awa. Beno nyonso ke belama kaka, na yawu muntu nyonso lenda simba ntangu yayi.

²⁷⁹ Nzambi ya luzolo, na Nkumbu ya Yesu Klisto, beto ke sambila samu na bantu yayi, bayankaka na kati ya bawu kele na mpasi, bikata. Kuna maboko ya milongi yango, Mfumu, ke vutuka mpe ke basika mosi na yankaka. Mu ke sambila ti Nge ke belusa mosi na mosi ya bawu, Mfumu. Bika ti Mpeve-Santu kukwisa na zulu ya bantu yina, mosi na mosi ya bawu, Tata. Mpe bika ti Ngolo ya nene ya Nzambi kufika bawu kaka na ntangu yayi, mpe bika bawu vutuka na yinzo mpe bawu beluka. Na kuzabaka yayi, ti Yesu tubaka, “Kana bawu tentika maboko ya bawu na zulu ya bambevo, bawu ke beluka.” Nge silaka yawu, Nzambi ya Luzolo. Beto ke kwikila yawu. Beto ke kwikila yawu, samu ti Nge tubaka mutindu yina mpe beto zaba ti ya kele mutindu yina, mutindu mosi bantu yayi ke beluka. Na Nkumbu ya Mfumu Yesu Klisto, mu ke sakumuna bawu nionso. Amen.

²⁸⁰ Nzambi sakumuna nge. [Kisika ya mpamba na bande—Mu.]

²⁸¹ Ntima ya munu ke ndima kubeluka ya nzutu samu na mosi na mosi ya beno. Mu ke kwikila yawu. Beno ke kwikila yawu na munu, beno nionso ntangu yayi? Kaka yina. Mu tubaka na beno kieleka, kaka mutindu mu zaba yawu. Mu zola beno, mpe Nzambi sakumuna beno. Mpe mu—mu ke kwikila, na ntima ya munu ya muvimba, nge ke beluka. Mpe bika ti balusakumunu ya munu kuvwanda na mosi na mosi ya beno ntangu yayi. Bika ti Nzambi ke tala beno mpe kukeba beno. Beno kele na kati ya bisambu ya munu. Beno ke sambila samu na munu na yina mu kele na Afrika mutindu yina? Mu—mu zola beno. Mpe mu ke mona beno mbasi na nkokila. 🐦

65-0427 Nzambi Ke Sobaka Dibanza Ya Yandi?
Hotel Embassy
Los Angeles, Californie U.S.A.

KIKONGO-KITUBA

©2024 VGR, ALL RIGHTS RESERVED

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org

Luzabusu samu na kubasisa mikanda

Muswa nionso kele ya yandi. Muntu nionso lenda kubasisa buku yayi na masini ya yandi ya yinzo samu na yandi mosi, to kukabula yawu ya mpamba, mutindu kidadilu samu na kumwangisa Nsangu ya mbote ya Yesu Klisto. Ba lenda tekisa buku yayi ve, kubasisa yawu na lutangu ya kulutula mingi, kutula yawu na site internet, kubumbisa yawu na kibumbulu ya bansangu, kubangula yawu na bandinga yankaka, to kulomba mbongo kukondwa muswa yina me sonama na Voice Of God Recordings®.

Na yina me tadila bansangu ya kulutula mingi to samu na yina me tadila bisadulu, beno sonikila:

VOICE OF GOD RECORDINGS

P.O. BOX 950, JEFFERSONVILLE, INDIANA 47131 U.S.A.

www.branham.org